

MAK

God so ok-ihēy Mak hiy ma mey hok non

Meyamey uwr hokwe: Mak.

Yier hiy ma lwayr meyamey hokwe: Hiykwe yier Rom mon meyamey. Enekwei hiy ma meyamey hokwe: Hiykwe enekwei Yia 60-65 so ompok sok meyamey, Jisas hiy ma lokrue so meyki.

Ok mamey mon ma lwak mokwe senkin: Jon Mak hiykwe aposel Pol so wayh-ih lwak liok, sawk hiykwe hie lokriy hain (Aposel 13:13). Hiykwe mamey okukwe Rom mon lwayr meyamey, ok aposel Pita hiy ma me hain seme. Mak so mamey kokwe weynpaweyn Pita hiy hyo nene arian non ma lira ha me mesair kow. Mak so uron ko hokwe senkin, hiykwe ok-ihēy ke ma mesor nona nona ke hou kamon-aw ma-swa-hokruw ey. Mak hiykwe Jisas so weynpaweyn me mesor kraiy, seyr Jisas so wik pariawey hiy aw ma nak-ok o, hiy ma lokrue o, hiy ma loksian o, seme aiopey hay nuw-mesor. Sawk Mak hiykwe Jisas so hiymon sorasor ok kokwe ipey-ar mesor pa. Mak hiykwe, Jisas hiy hyo lokrue enekwei se enekwei krompri sankaw ma mesor kow koruay hokwe, Mak hiykwe seme nak-meyamey kumay kow. (8:31; 9:31; 10:33-35)

Mak so uron ko hokwe senkin: Mak hiykwe senkin me-sanion sow, Jisas hiykwe God so mey-uwr ipey-ar, hyo uron ko me meio e ma le hiy non. Jisas so meir krai non o, uwrsa me mon popriy kow yor o, poup piap-araw me ma me-su ha yor o, hreme senkin mesair kow, Jisas hiykwe mey-uwr paraw-uh me hieyn korey, hiykwe irweyk-aw. Mak hiykwe seyr hyo mamey kokwe sokwe meyamey, kristen-uwrsa Rom ko me hiymon kraipakrai e, sa hom makuayk sakuayk ame. Payhokuaw, enekwei sohiy sok kokwe kristen mo owh mon kokwe mon piapmapiap yor mokwe po lousne.

Jon, hu mon prouk uwr, hiy ok ma mesor kow hiy non
(*Mat 3:1-12; Luk 3:1-9,15-17; Jon 1:19-28*)

1 ¹Okukwe ok-ihēy Jisas Krai, God so Ney se ma mey pie hok non.
²Ok-ihēy sokukwe profet Aisaia hiy ma mey senkin lousne pie.

“God hiykwe senkin me,

‘Hakwe hano ok me mesor kow uwr se hno peyrmawk me-ha ey.

Hiykwe hno yerki se meio kow koruay ey.’ *Mal 3:1*

³ Uwr prueyn so wouk-ok kokwe ki hrahra-aw mon lanio okre,

‘Hakamay so yerki se meio kow koruay e, yerki luw-luw-aw hiy lanio ey me meio e.’ ” *Ais 40:3*

⁴ Jon, hu mon prouk uwr hiykwe sa ki hrahra-aw mon sehe lousne, hu mon prouk ok ke mesor. Hiykwe uwr sa me senkin me, “Hmo uron me kankoum nok, hu mon prouk, sa God hiykwe hmo yor piap me ya lorionay kow a.”^a ⁵ Sa uwr sa lowpwarowp kipay Judia ko o, yier Jerusalem ko o, Jon so ow h mon ley neyney. Sa homkwe hmo yor piap-araw me seme me-hrorsay kow, sa Jon hiykwe hmekwe yawp Jordan mon prouk. ⁶ Ow h ko omeme, Jon hiy ma lie kokwe, kamel-owhma non meio.^b Hiykwe sumow-mays ayay non ma meio ke lok sapeykyay. Seyr ayay hiy ma la mokwe pokuayp o, eirpow-hu sapa ko o.^c ⁷ Hiykwe senkin mesor, “Uwr, hano meyki ma le ey sohokwe, krai ipey-ar non, hano eir mon lwak. Hakwe yaprue-ar korey, hyo sune-ohi-mays ke kampueys kahrer kow ey hokwe.”^d ⁸ Hakwe hmekwe hu non prouk, sawk hiykwe hmekwe Niohney Pekney-weys non prouk ey.”

Jon hiy Jisas se hu mon ma prouk hiy non

(Mat 3:13-17; Luk 3:21-22)

⁹ Enekwei sohokwe Jisas hiykwe yier Nasaret, kipay Galili mon ma lwak ko se le. Sa Jon hu mon prouk-uwr hiykwe, hye sehe prouk, yawp Jordan mon. ¹⁰ Peypey pa, Jisas hiy hu ouon ko se leirsow menkin, hiykwe sa nonkumey, hiy lon-kampi se lira. Sa niohney hiykwe ahney woukmow ke hieyn laye nok, hyo eir mon maka-sian yay iwak. ¹¹ Sa wouk-ok kamon nonkumey ko hiy senkin me se lonuayk, “Hunkwe hano Ney, hakwe hne uron-pi ko-ar lwak, seyr hne yaprue nan ihey.”^e

¹² Peypey pa, sa God so Niohney hiykwe Jisas se ki hrahra-aw mon hiy-ey. ¹³ Hiykwe serey kokwe, enekwei 40, sankaw lwak. Sa Satan hiykwe hye kokwe serey leykawn ir. Ayay aiopey hay sapa ko homkwe seyr serey lwak, sawk hyekwe ensel hom hiy mon.^f

Jisas hiykwe ki-wayh iha-ihaw me me-huonok pie

(Mat 4:12-22; Luk 4:14-15; 5:1-11)

¹⁴ Enekwei Jon se kalabus-a mon ma nak-piar sakawk so meyki hokwe, Jisas hiykwe Galili mon ley nok, God so ok-ihay ke mesor kow.^g ¹⁵ Hiykwe

^a 1:4 Ap 13:24; 19:4 ^b 1:6 Enekwei sohokwe, ow h ko omeme kamel-owhma non ma meio mokwe, uwr sa omeme lopa o, profet o, hom lie. ^c 1:6 2 Kin 1:8; Mat 11:8 ^d 1:7 Ap 13:25
^e 1:11 Sng 2:7; Ais 42:1 ^f 1:13 Sng 91:11-13 ^g 1:14 Mak 6:17

senkin me, “Enekwei-ar hokwe po kiy-ousne, God so Wayr-hre-yier hokwe ohriar lwak. Hmo uron me kwa kankoum, seyr ok-ihyey ke kwa nanpanan kiykiy-ay.”^h

¹⁶Jisas hiy howk Galili ki-someik mon lanio non-aw, hiykwe sa Saimon se lira, nay-ih Andru o. Hohkwe yawk howk mon swakeyn, payhokuaw, hohkwe ay-yawk swakeyn-uwr. ¹⁷Sa Jisas hiy hehe senkin me, “Oue, hohkwe hano meyki pyay e. Sa hakwe hehekwe uwrsa me swakeyn wawk uwr mon wak ey.” ¹⁸Seseyn, hohkwe yawk me lokriy hain nok, Jisas so meyki pyay ha.

¹⁹Jisas hiy maka-ley menkin, hiykwe sa Jems se lonyay, hyo nay-ih Jon o, hohkwe Sebedi so ney. Homkwe seyr yeyk mon lwak, yawk me lompan. ²⁰Kiy-peypey pa, hiykwe sa hehe me-huonok. Hohkwe hoho orih Sebedi o, hoho mey-uwr sohom o, yeyk mon-aw lokriy hain nok, Jisas so meyki pyay ha.

Jisas hiy niohney piap-araw se ma me-su ha hiy non

(Luk 4:31-37)

²¹Jisas o, hyo ki-wayh o, homkwe Kaperneam mon ley-neyney. Sa sabat-enekwei hiy lousne menkin, hiykwe Juda mo hokruw-a mon lyawriy nok, uwrsa me hiymon sorasor. ²²Sa uwrsa hye ma lonuayk homkwe hyo hiymon-sorasor yor ke kowkyay. Payhokuaw, hiykwe uwr, uru ipey-ar non se hieyn hiymon sorasor. Hiykwe Juda mo sow ke hiymon-sorasor uwr me hieyn hiymon sorasor pa.ⁱ

²³Enekwei sohiy nonaw kokwe, uwr prueyn, Juda mo hokruw-a serey ma lwak, niohney piap-araw non hiykwe aiopey hay senkin lokre me, ²⁴“Jisas Nasaret ko ara, hunkwe hremekwe penkin lon ey so? Hmey, hunkwe hreme mon piapay ey so? Hakwe hnekwe nonkway, hunkwe Pekneyweys, God hiy ma me-ha hiy non.”^j

²⁵Sa Jisas hiy hye me-kupaku sakawk, “Hunkwe ok lopa kiy-wak nok, hye kiy-okriy hain.” ²⁶Niohney piap-araw sohokwe uwr sehe mon prei-prei nok, aiopey hay weyr-weyr nok, uwr sehe lokriy hain.^k

²⁷Uwrsa lowpwarowp hom senkin lira kowkyay menkin, homkwe homkiaw-ayay senkin mesopok, “Ohokwe pay so? Okukwe mon-sorasor iwon-ar, seyr kraik non. Hiykwe niohney piap-araw me me-kupaku su-ha, sa homkwe hyo ok me lonuayk me.” ²⁸Sa peypey pa Jisas so mey mokwe, Galili mo kipay lowpwarowp mon sehe mesor nakian nakian.^l

Jisas hiykwe uwrsa kraiar mo peik me mon popriy kow

(Mat 8:14-17; Luk 4:38-41)

²⁹Hom Juda mo hokruw-a se lokriy hain menkin, sa Pita, Andru leys o a mon ley, Jems, Jon leys hoh sey. ³⁰Pita so meyk-ih nawp hokwe peik

^h 1:15 Mat 3:2 ⁱ 1:22 Mat 7:28-29 ^j 1:24 Mak 5:7 ^k 1:26 Mak 9:26 ^l 1:28 Mat 4:24

nakian. Hokwe owh-ya aiopey hay loum. Homkwe sa Jisas se sehe saw-me kow. ³¹Sa hiykwe hoko owh mon ley nok, hoke iha mon nekie ok-sian. Peik sokukwe sawk hoke lokriy hain, sa hokwe hmo ayay sokwe lunay kow-a.

³²Eyrowpwar sohokwe, ey hiy ma kuakeyn lopay so meyki hokwe, uwrsa homkwe, uwrsa peik non o, uwrsa niohney piap-araw non o, seme Jisas so owh mon hiy-ey. ³³Uwrsa lowpwarowp om serey suko somokwe a sohiy so yerki-wouk mon le hokruw lowpway. ³⁴Sa Jisas hiykwe uwrsa kraiar peik senkin senkin non me mon popriy kow, seyr niohney piap-araw kraiar me nak-me-su ha. Sawk hiykwe niohney piap-araw seme ok isay ohruw-a pa. Payhokuaw, Jisas hiy penkin uwr lwak e, homkwe po nonkway.^m

Jisas hiykwe Galili mon lanio mesor kow

(Luk 4:42-44)

³⁵Leisonon hokwe arawh nonaw, peyr eym-nawp lwak nonaw, Jisas hiykwe loksian nok, a se lokriy hain nok, ki hrahra-aw mon ley nok, orih se mesopok.ⁿ ³⁶Sawk hyekwe Saimon o, hyo wayh-ih nayh o, hom lanio pawk. ³⁷Hom hye lonyay menkin, homkwe hye senkin mekow, “Uwrsa lowpwarowp homkwe hne lanio pawk.”

³⁸Sawk hiykwe hme senkin me-kow, “Hromkwe yier har, ohri-ar erey ma lwak mon ley ey. Hakwe seyr hme ok me-sor kow ley. Payhokuaw, hakwe mo sehe le.” ³⁹Sa hiykwe yier lowpwarowp Galili ko mon sehe hiy-anio, hmo hokruw-a mon God so ok me mesor kow, niohney piap-araw me nak-me-su ha.^o

Jisas hiykwe uwr prueyn kuor lepra non se mon popriy kow

(Mat 8:1-4; Luk 5:12-16)

⁴⁰Uwr prueyn kuor lepra non hiykwe Jisas so owh mon le nok, hyo inour mon pamuow kampueys nok, senkin lonsey, “Hunkwe hane hiy-mon e nan ankin, hunkwe hane liy mon mnow-mnow kow.”

⁴¹Sa Jisas hiykwe uron nuw-owk, sa hyo iha ke ka-yenyeyn ha nok, hye kiy-sapou nok, hye kiy-mekow, “Hakwe hwon yaprue lwak e nan.” ⁴²Kiy-peyepay pa, sawk hyo kuor lepra non somokwe hye lokriy hain, sa hiykwe yaprue sehe lwak.

⁴³Jisas hiykwe hye nuw-me-kupaku nok, sawnak-me-ha, ⁴⁴senkin, “Mey, arakwon hno owh mon ma lousne sokukwe, unsaney har me peie mesor sanion sow kow o. Sawk hunkwe pris se-aw kwa nak-ey mesair kow. Seyr uwrsa me senkin mesair kow ey hokwe, hnekwe po mon mnow-mnow kow, hunkwe nraws-prawk-kow-mey Moses hiy ma me-

^m 1:34 Mak 3:10-12 ⁿ 1:35 Mat 14:23; Mak 6:46 ^o 1:39 Mat 4:23; 9:35

kupaku ke kwa meio.”^p 45 Sawk uwr sohokwe ley nok, mesor owndiy owndiy, weyn hyo mon ma lousne sokwe. Sohuy so hokuaw kokwe, Jisas hiykwe, om somokwe inopuaw ma-lyawriy pa sehe lwak. Hiykwe sawk om meykyay mon-aw lwak, ki hra-hra-aw mon. Mo senkin lwak liok e, uwrso om lowpwarowp serey suko homkwe hyo owh mon ley neyney nonaw lwak.

Jisas hiykwe uwr sune-ihā ma lomposyay se mon popriy kow
(*Mat 9:1-8; Luk 5:17-26*)

2 1Eypok har mo meyki hokwe, Jisas hiykwe Kaperneam mon ma-ley. Uwrso homkwe sa senkin lonuayk, hiykwe hyo a arian mon lwak. 2Uwrso kraiar homkwe sa a serey hokruw konpakon, a sohokwe sa yop lopa-araw sehe lwak, mo yerki-wouk kumay mon seyn. Jisas hiykwe sa hme kokwe God so ok me mesor kow. 3Sawk uwr iha-ihā-aw homkwe uwr prueyn sune-ihā ma lomposyay se Jisas so owh mon lway nak-e. 4Sawk uwrso ma nuw-hokruw konpakon me hokuaw kokwe, homkwe uwr sehe Jisas so mon liy hiy-ey ley. Sa homkwe nonow a-suwur mon seme kan-kor, Jisas hiy ma lwak so liyliy-aw. Hom nonow non lwak menkin, peik-uwr sey non sehe kyor-nak-ok ha. 5Jisas hiy hmo nan kiykiy-ay me lira menkin, hiykwe sa uwr sune-ihā ma lomposyay sehe senkin kiy-mekow, “Hano ney ara, hno yor piap-araw mokwe po lorionay kow.”

6Juda mo sow ke hiymon-sorasor uwr har homkwe seyr serey non-iwak sir. Homkwe homkiaw-ayay senkin nanpanan, 7“Uwr sohokwe senkin payhokuaw me o? Hiykwe God se me-piapmapiap. Yor piap-araw me lorionay kow ey hokwe, God hiykiaw-aw.”

8Hom senkin ma nanpanan mokwe, Jisas so niohney hiykwe po saw-nonkway. Sa hiykwe hme senkin seme mekow, “Homkwe uron senkin me panoke nanpanan o? 9Mey honon honon lopa peik-uwr se meio kow ey kokwe pohok non ko? Hakwe enkin kiy-me e mon pak, ‘Hno yor piap-araw mokwe po lorionay kow,’ hai, hakwe enkin kiy-me e mon pak, ‘Hunkwe lok-sian nok, hno mat ke lway nok nok, nakey?’ 10Hakwe pokon kokwe hme senkin kiy-meio mesair kow ey, Uwrso mo Ney hiykwe ki erey mon kokwe kra non, yor piap-araw me lorionay kow ey hokwe.” Sa Jisas hiykwe uwr ma lomposyay se senkin sehe me, 11“Hakwe hne senkin kiy-me, hunkwe kiy-oksian iarok nok, hno mat ke kiy-way nok nok, nakey, hno a mon.” 12Uwrso mo nene nonaw kokwe hiykwe lok-sian nok, hyo mat ke kiysaw-way nok nok, nakey. Uwrso lowpwarowp somokwe nuw-ira kowkyay, sa homkwe God so uru se sehe lowk nakie me-ihēy, senkin, “Paraw kokwe hromkwe weyn senkin me lira pa.”

^p 1:44 Wkp 14:1-32

Jisas hiykwe Livai se me-huonok

(Mat 9:9-13; Luk 5:27-32)

¹³Jisas hiy howk-ki-someik mon ma-ley. Sa uwr sa kraiar homkwe hyo owh mon le, hiykwe sa hme seme hiy-mon sorasor. ¹⁴Hiy ley nonaw, hiykwe sa Livai, Alfius so ney se lira. Livai hiykwe takis-lonok-a mon liwak. Jisas hiy hye me, “Hano meyki pyay e.” Livai hiy sa sehe loksian nok, hyo meyki pyay ha.

¹⁵Sohiy so meyki hokwe, Jisas hiykwe Livai so a mon ayay la. Takis-lonok-uwr kraiar o, uwr yor piap-araw non o, homkwe seyr Jisas se nion liwak sir a, hyo ki-wayh o. Payhokuaw, uwr sa kraiar senkin somokwe Jisas se ma lonsu merie merie hom non. ¹⁶Juda mo sow ke hiymon-sorasor uwr, Farisi-ok ma me hom senkin lira menkin, Jisas hiykwe uwr yor piap-araw non o, takis-lonok-uwr o, hme nion ayay non-a, homkwe sa hyo ki-wayh me senkin seme mesopok. “Hiykwe uwr yor piap-araw non o, takis-lonok-uwr o, hme nion panoke non-a o?”^q

¹⁷Jisas hiy senkin lonuayk menkin, hiykwe sa hme senkin me-kow, “Uwr peik lopa homkwe, dokta se liy ley ira ley. Uwr peik non homkwaw ley ira. Hakwe sehe le pa, uwr luw-luw-aw me me-huonok e. Sawk hakwe uwr, yor piap-araw non me me-huonokyaw e le.”

Ayay la lopa God se ma mesopok yor ke ma mesopok hiy non

(Mat 9:14-17; Luk 5:33-39)

¹⁸Enekwei kamon hokwe, Jon so ki-wayh o, Farisi o, homkwe ayay la lopa God se mesopok wayr. Uwr har homkwe sa Jisas se sehe le mesopok, senkin, “Jon so ki-wayh o, Farisi o, homkwe ayay la lopa God se mesopok wayr. Sawk hno homkwe senkin lon pey. Hai, suw penkin so?”

¹⁹Jisas hiykwe sa senkin ma-sahre onuayk me. “Hai, uwr sa, sa-huon-uwr hiy sa huon enekwei sok ma me-huonok okyaw homkwe, enekwei sa-huon-uwr hiy hme nion ma non-wak sohokwe, ayay la lopa panoke lwak o? Enekwei hiy hme nion ma non-wak hokwe, homkwe senkin liy lon ley. ²⁰Sawk enekwei sa-huon-uwr se hmo ompok ko se le nekie nok ey hokwe ya lousne a. Sa homkwe enekwei sohiy non ayay la lopa mesopok ey.

²¹Unsanehy homkwe laplap kopi iwon ke omeme owh ko porih ko nonow se seyn nak-pror pey. Hom senkin lon ankin, laplap kopi iwon hokwe sa leiok, sa porih ko nonow se aiopey hay nuw-mon pirapir ha. ²²Seyr unsanehy homkwe, wain iwon mokwe wain-ohi’ porih mon seyn nonkreik pey. Hom senkin lon ankin, wain somokwe ohi seme lohuwn ie

^q 2:16 Mat 11:19 ^r 2:22 Wain-ohi mokwe Juda homkwe ay har mo ohi non meio, wain nonkreik ey me.

piy-piy-ay seyr-say. Sa wain o, wain-ohi o, hehe mon piapay. Sawk wain iwon mokwe, wain-ohi iwon mon nonkreik.”

Jisas so ok, sabat-enekwei se ma me hiy non
(*Mat 12:1-8; Luk 6:1-5*)

²³Sabat kamon hokwe Jisas hiykwe, wit-wueir ompok mon lanio,^s hyo ki-wayh me nion. Sa homkwe wit har wueir ko me lanio krora. ²⁴Sa Farisi homkwe Jisas se senkin me, “Lira e, yor hno ki-wayh hom sabat-enekwei sok ma mon sokukwe, hromo sow ke kamaun sow.”^t

²⁵Jisas hiykwe sa senkin ma-sahre me, “Homkwe weynpaweyn Devit o, hyo sune non o, hom siowp lokrue non ma meio kokwe, lira mesor pa ko?” ²⁶Enekwei sohokwe Abiatar hiykwe Pris Makwey-uwr lwak. Devit hiykwe God so a mon lyawriy nok, ihey mo naw pekney-weys God se ma kow ke la. Hromo sow hokwe senkin me, naw somokwe pris homkwaw la. Sawk Devit hiykwe naw seme la, seyr har mokwe hyo sune non me kow a.”^v

²⁷Jisas hiy hme makiynak-me, “Sabat-enekwei hokwe, uwr sa me hiymon e monhre, sawk uwr sa mokwe sabat-enekwei se monhre kow pa.” ²⁸Suw senkin, Uwr sa mo Ney hiykwe mo Sabat-enekwei so Hakamay.”

Sabat-enekwei hokwe, Jisas hiykwe uwr iha piap non
se mon popriy kow
(*Mat 12:9-14; Luk 6:6-11*)

3 ¹Enekwei kamon Jisas hiy Juda mo hokruw-a mon ma-lyawriy menkin, uwr prueyn hiykwe seyr serey lwak. Hyo iha kamon kokwe, korway-araw. ²Hmo har homkwe Jisas se lokin lor-a-lor kow yerki se pawk. Sa homkwe Jisas se seme nuw-ira kraipakrai, hiy uwr sehe sabat-enekwei sohiy non mon popriy kow me lira e. ³Jisas hiy uwr iha korway sehe kiy-me, “Uwr sa lowpwarowp mo inour mon kiy-iarok.”

⁴Hiy sa hme senkin mesopok, “Hai, sabat-enekwei hokwe, hromo sow hokwe ipan yor penkin me lon o? Weyn yaprue me mon e? Weyn piap-araw me mon e? Uwr sa me hiymon popriy e? Uwr sa me lokin kwor okrue e?” Sawk homkwe ok kamon ma-sahre me pa.^x

⁵Hiykwe sa hme kokwe aw-mar nonaw sehe nuw-ira hriykwow hriykwow, seyr hiykwe hme uron nuw-owk kwor-pa-kwor kaww, payhokuaw, hmo uron mokwe kraik nuw-wak. Sa hiykwe uwr sehe senkin sehe kiy-me, “Hno iha ke kwa ka-yenyeyn ha.” Hiykwe sa sehe ka-yenyeyn ha, sa hyo iha kokwe, yaprue sokwe ma-lwak. ⁶Farisi homkwe sa ley ney-ney nok,

^s 2:23 Wit mokwe, Juda hom saro, somokwe ihey mo naw monhre ey. ^t 2:24 Lo 23:25

^v 2:25 1 Sml 21:1-6 ^w 2:26 Wkp 24:5-9 ^x 2:27 Lo 5:14 ^y 3:4 Luk 14:3

Herot so sune non me nion non-hokruw nok, ok lohruw onsan kawkw,
Jisas se lokin kwor okruwe yerki se.^y

Uwrsa kraiar homkwe Jisas so meyki pyay

(Luk 6:17-19)

⁷Jisas o, hyo ki-wayh o, homkwe om sehe lokriy hain nok, howk Galili mon ley. Uwrsa popua-hay Galili ko o, Judia ko o, homkwe sa hyo meyki nuw-pyay ha. ⁸Seyr uwrsa popua-hay Jerusalem ko o, Idumea ko o, Jordan menki ko o, Tair ko o, Saidon ko o, homkwe mey ipey-ar, Jisas hiy ma meio seme lonuayk me le-nene. ⁹Uwrsa popua-hay ma nuw-hokruw konpakon me hokuaw kokwe, Jisas hiykwe sa hyo ki-wayh me seme me, yeyk hye lwawk kow e, uwrsa hom hye mon kane kawkw ame. ¹⁰Hiykwe uwrsa kraiar me papo mon popriy kow, sa uwrsa har peik non homkwe losi neyk-a-neyk ne nonaw lwak, homkiaw hye sapou e.^z ¹¹Niohney piap-araw homkwe hye lira menkin, homkwe hye pamuow kampueys nok, ok aiopey hay senkin lokre me, “Hunkwe God so Ney.”^a ¹²Sawkw Jisas hiykwe hom hye me-sanion sow kow ey hokwe, ok ipey-ar nuw-me-kupaku sakawk.^b

Jisas hiy aposel iha seys mu nareysyar non me ma me-iaup hiy non

(Mat 10:1-4; Luk 6:12-16)

¹³Jisas hiykwe mnuw mon liau nok, uwr har, hiykiaw ma nanpanan me me-huonok. Homkwe sa hyo owh mon seme le-nene. ¹⁴Sa hiykwe iha seys mu nareysyar non sankaw liaup nok, hme uru aposel se kiy-nakinariy kow. Hiykwe hme senkin me-kow, “Hakwe hme seme me-iaup, hane nion non-wak e. Hakwe seyr hme me-ha ey, God so ok me lanio sor kow e.” ¹⁵Seyr homkwe krai, niohney piap-araw me me-su ha ey non lwak ey.”

¹⁶Uwr iha seys mu nareysyar non hiy ma me-iaup mo uru mokwe, senkin: Saimon, hyo uru kamon Jisas hiy ma nak-anio kow hokwe: Pita.^c ¹⁷Seyr Jems o, hyo nay-ih Jon o, hohkwe Sebedi so ney. Hoho uru kamon hokwe, Jisas hiykwe senkin nak-anio kow: Boanerges. Uru sohiy so meyk hokwe, Nompow so ney.^d ¹⁸Seyr Andru o, Filip o, Bartolomyu o, Matyu o, Tomas o, Jems o. Jems hiykwe Alfius so ney. Tadius o, Saimon o, hiykwe Selot mo uwr prueyn hiy non. ¹⁹Seyr Judas Iskariot, uwr Jisas se awia mo iha mon ma kow okin kwor okruwe o.

Jisas o, Belsebul o

(Mat 12:24-32; Luk 11:14-23; 12:10)

²⁰Jisas hiykwe a kamon mon lyawriy, sa uwrsa popua hay homkwe hyo owh mon ma-hokruw. Sa Jisas o, hyo ki-wayh o, homkwe ayay enekwei

^y 3:6 Mat 22:15-16 ^z 3:10 Mat 14:36 ^a 3:11 Luk 4:41 ^b 3:12 Mak 1:34 ^c 3:16 Jon 1:42

^d 3:17 Luk 9:54

korey korey kiy-a ley. ²¹Jisas so uwrku siraw-aw hom senkin lonuayk menkin, homkwe sa hye huonok e le liok. Payhokuaw, homkwe senkin me, hiykwe lawk-lawk.

²²Juda mo sow ke hiymon-sorasor uwr, Jerusalem ko me ma laye hom me, “Niohney piap-araw mo makwey-uwr Belsebul hiykwe hyo mon lwak. Jisas hiykwe hyo kraik non me-su ha, niohney piap-araw mokwe.”^e

²³Sawk Jisas hiykwe hme ka-me-huonokyaw nok ok, hme owhnan-ok non kiy-mesopok, senkin, “Hai, Satan hiykwe Satan se liy me-su ha o? ²⁴Kipay kamon hiykwe hiykiaw-ayay, aw lokima ha ono ankin, kipay sohokwe kraik liy lwak ley. ²⁵Uwrku kamon hiykwe hiykiaw-ayay, aw lokima ha ono ankin, uwrku sohokwe kraik liy lwak ley. ²⁶Seyr Satan so sune non homkwe homkiaw-ayay aw lokima ha ono ankin, homkwe nakrok kraiy lopa, seyr lira por ha. ²⁷Uwr ipey-ar so a omeme non hokwe, uwr prueyn hiykwe liy kros yawriy opri ley. Sa uwr sohokwe, senkin lon e mon ankin, peyr hiykwe uwr ipey-ar sehe lway pruwmapruw yay. ²⁸Hakwe hme ok-ar kiy-mekow, uwrso mo yor piap-araw o, ok-piap-ok hom ma me o, somokwe liy lorionay ha. ²⁹Sawk uwrso homkwe Niohney Pekney-weys se ok-piap-ok me ankin, hyekwe liy lorionay kow ley, payhokuaw, hiykwe yor piap-araw lwak peyow ey ke po mon.”

³⁰Jisas hiykwe senkin sehe me, payhokuaw, homkwe senkin me, hiykwe niohney piap-araw non.

Jisas so pouh o, nay-ih nayh o

(Mat 12:46-50; Luk 8:19-21)

³¹Jisas so pouh o, nay-ih-nayh o, homkwe sa enekwei sohiy non am-orousne. Homkwe ki-apau mon nakrok, sa unsaney prueyn se me-ha, Jisas se lyawriy mekow e.^f ³²Uwrso poya-poya homkwe hye liwak sir awndiy kaw, sa homkwe hye senkin mekow, “Hno ipey o, nay-om ine-om o, ki-apau mon lwak, hne pawk.”

³³Hiykwe sa senkin lonuayk me, “Hano ipey o, hano nay-om o, posokwaw mo?”

³⁴Hiykwe sa uwrso hye ma liwak sir awndiy kaw seme lira nok, kiy-me, “Lira e, hano ipey-om, nay-om mokwe, eme.” ³⁵Hano nay-om, ine-om, ipey-om mokwe uwrso, God so uron ko me ma pyay sohomkwaw.

Uwr, wit-i me ma lanio ouh-say so owhnan-ok

(Mat 13:1-9; Luk 8:4-8)

4 ¹Jisas hiykwe uwrso me mahiy-mon sorasor, howk-ki-someik mon. Uwrso, hye ma hokruw awndiy kaw mokwe kraiar-ar. Sa hiykwe yeyk kamon mon sehe lwawk wakiawkeyn. Yeyk hokwe howk-iway mon

^e 3:22 Mat 9:34; 10:25 ^f 3:31 Mak 6:3; Jon 2:12; Ap 1:14

lwak. Uwrsa homkwe sa howk-ki-someik mon swa-hokruw, hu-sane mon.^g
²Hiykwe omeme kraiar mokwe owhnan-ok non hiymon sorasor. Hiykwe senkin mesor,^h

³“Homkwe kwa lonuayk. Enekwei kamon hokwe, uwr prueyn hiykwe wit-i me lough-say e ley. ⁴Hiy wit-i seme ma lough-say hokwe, har mokwe yerki mon makuayk sakuayk. Sa ahney hom sian-yay sowkriy-a. ⁵Har mokwe ki, mein non mon makuayk sakuayk, ki sorpay-aw ma kor-wak mon. Peypey pa, wit-i somokwe, yok suw-soma-seyr, payhokuaw ki hokwe sorpay-aw. ⁶Sawk ey hiy lo menkin, hme lo ian-pa-ian som-kreik. Payhokuaw, homkwe meyk loksow popriy pa. ⁷Har mokwe ur inan non mo ompok mon makuayk sakuayk. Ur inan non hom swar menkin, sa hme way hoaho, homkwe sa ay leip pa seme lwak. ⁸Sawk wit-i har mokwe ki yaprue-ar mon makuayk sakuayk. Homkwe yok kei nok, lie nok, ay leip. Ayay mokwe sankaw leip, har mokwe 30, har mokwe 60, har mokwe 100.”

⁹Sawk hiykwe hme senkin me-kow, “Uwr nweyk non lwak ankin, hiykwe ok seme kwa lonuayk.”

Owhnan-ok non ma mesor so meyykar

(Mat 13:10-17; Luk 8:9-10)

¹⁰Sa omok Jisas hiykiaw-aw lwak menkin, hyo ki-wayh o, uwr har hye ma awndiy kawk sohom o, homkwe Jisas se owhnan-ok sohom mo meyykar me mesopok. ¹¹Hiykwe sa hme senkin mekow, “God so yier so ouon-aw-ok kokwe, hme po kow, sawk uwrsa meyykay mon ma lwak somokwe, omeme lowpwarowp mokwe owhnan-ok nonaw lonuayk. ¹²Suw senkin,

‘Mo hom lira-lira liok e, sawk liy lirway ley. Mo hom lonuayk lonuayk liok e, sawk meyykar mokwe liy nonkway ley. Seyr senkin, homkwe sa hmo uron me kankoum ame, seyr God hiy hmo yor piap-araw me lorionay ha ame.’ ” *Ais 6:9-10*

Wit-i mo owhnan-ok ko meyykar

(Mat 13:18-23; Luk 8:11-15)

¹³Jisas hiykwe hmekwe sa senkin mesopok, “Homkwe owhnan-ok okukwe nonkway lwak pey? Senkin lwak ankin, hai, homkwe owhnan-ok har mokwe penkin nonkway ey mo? ¹⁴Uwr wit-i me ma lanio ouh-say sohokwe, God so ok me lanio ouh-say. ¹⁵Uwrsa har homkwe wit-i yerki mon ma makuayk sakuayk me hieyn. Hom kiy-nuw-onuayk nonaw, Satan hiykwe le nok, ok hmo uron mon ma lough-say seme lonokyaw ok. ¹⁶Uwrsa har homkwe wit-i, ki mein non mon ma makuayk sakuayk me

^g 4:1 Mak 3:7-9; Luk 5:1-3 ^h 4:2 Mat 13:34; Mak 4:33-34

hieyn. Hom ok ke kiy-nuw-onuayk nonaw, homkwe kar nonaw nak-onok. ¹⁷Sawk hom meyk loksow pa ma lwak me hokuaw kokwe, homkwe enekwei meipey seyn lwak pey. Hme mon yorpayor ankin, seyr hom low non lwak ankin, homkwe makuayk sakuayk lira por ha. ¹⁸Uwrsa har homkwe, wit-i ur inan non mo ompok mon makuayk sakuayk me hieyn. Somokwe God so ok ke ma lonuayk hom non. ¹⁹Sawk homkwe yor kraiar ki ko me nan kworpakwor, seyr omeme kraiar nak-wayr e ma lira way o, seyr omeme har me ma nan koutou-ay o, sohom lyawriy-sawriy mon kane kaw, sa homkwe ay leip pa seme lwak.ⁱ ²⁰Sawk uwrsa har homkwe wit-i ki yaprue mon ma makuayk sakuayk me hieyn. Homkwe ok ke lonuayk nok, lonok nok, ay leip ok. Har homkwe 30, har homkwe 60, har homkwe 100.”

Ya, yowr ouon mon ma nak-kwawk sue hiy non
(Luk 8:16-18)

²¹Seyr Jisas hiy hme makiy-me, “Hai, uwr prueyn hiykwe lam se yowr ouon o, sey liawon ey ko ouon o, serey pankaw loum pukuyak nak-kwawk o? Korey, sawk hiykwe lam sohokwe sey ayaw mon nak-yay yar.^j ²²Ompay ompay ma lwak sue mokwe, kumay mon ya nak-ousne sa-ousne a. Seyr ompay ompay ma nak-sapos sapos sue mokwe, ya leyp-say hrahra ha a.^k ²³Uwr nweyk non lwak ankin, hiykwe ok seme kwa lonuayk.”

²⁴Seyr hiy me, “Ok hom ma lonuayk mokwe, kwa nanpanan popriy. Meir, hom uwrsa har me ma lira sor anon non kokwe, God hiykwe seyr hme kokwe meir sohom nonaw lira sor anon ey, seyr ipey-ar manak-kow ey.^l ²⁵Uwr prueyn hiykwe payay me nak-wayr e, hye kokwe kraiar manak-kow peykyay. Sawk uwr prueyn hiykwe puraw-ar nuw-wak ankin, sawk hiy payay se kornak-wayr e, sohokwe seyr ma-kahya.”^m

Ayay-i ma kei mo owhnan-ok

²⁶Jisas hiy makiy-me, “God so Wayr-hre-yier hokwe, uwr prueyn, ayay-i ki mon ma louh-say sian me hieyn. ²⁷Arawh enekwei hokwe, hiykwe anwaw liawon nayr. Eypok hokwe hiykwe loksian anio kok. Enekwei sohokwe, ayay-i somokwe, yok kei lousne sa-ousne ie, sawk hiykwe ayay-i sohom penkin kei lousne sa-ousne e, hiykwe nonkway lopa. ²⁸Ayay-yok mokwe mo ki hiykiaw-aw mon eyr ie, ayay leip sawan kreik nok. Peyr, yok iwon hiy lousne pie, sei, ku hiy lie nok, simonpiy hiy lore ok. ²⁹Simonpiy hom aiopey-hay lwak ankin, uwr sohokwe seik ke lonok nok, simonpiy seme ompan kaw ok. Payhokuaw, ayay la enekwei hokwe papo lousne.”ⁿ

ⁱ 4:19 Mat 19:23-24 ^j 4:21 Mat 5:15; Luk 11:33 ^k 4:22 Mat 10:26; Luk 12:2 ^l 4:24 Mat 7:2 ^m 4:25 Mat 13:12; 25:29; Luk 19:26 ⁿ 4:29 Jol 3:13; MHO 14:15

Owhnan-ok, mastet-i se ma me hiy non
(*Mat 13:31-35; Luk 13:18-19*)

³⁰Jisas hiy ma-me, “God so Wayr-hre-yier hokwe, penkin so, hromkwe penkin kiy-me ey so? Hromkwe owhnan-ok penkin ke kiy-me memeir o? ³¹God so Wayr-hre-yier hokwe, mastet-i^o se hieyn. Mastet-i hokwe, ayay-i lowpwarowp ki mon ma saro mo paswaw-ar. ³²Sawk hye ki mon saro ankin, hiykwe kei ie nok, ayay lowpwarowp wueir ko mo aiopey-hay-ar nuw-wak, seyr kueim aiopey-hay non nuw-wak. Sa ahney ayaw ko homkwe, hne, hyo kueim-eykos mon sian-yay sowkriy meio iawon sowkway ok.”

³³Jisas hiykwe uwrsa me kokwe owhnan-ok kraiar liyliy-aw senkin non mesor kow. Seyr hiykwe hom nonkway ey mo limon nonaw mesor kow. ³⁴Hiykwe uwrsa me kokwe ok kamon owhnan-ok lopa mesor kow pa. Sawk enekwei hiy hyo ki-wayh arian me nion-aw non-wak menkin, hiykwe ok lowpwarowp mo meykwar mokwe sohiy non mesor kow.

Jisas hiy howniy, hu-par leys se ma me-kueyn-yay
(*Mat 8:23-27; Luk 8:22-25*)

³⁵Eypok sohiy so eyrowpwar hokwe, Jisas hiy hyo ki-wayh me kiy-me, “Ama, hromkwe karayh menki mon lokuan e.” ³⁶Homkwe uwrsa popua hay me lokriy hain nok, yeyk hiy ma wakiawkeyn serey lwawk. Yeyk har seyn, hme nion siraw non-hiok kuan. ³⁷Sa howniy aiopey hay hok pa kiynuw-way huwhuw oksian, seyr hu-par hom kiy-nuw-oksian swa-popapop swanon-kwawk, yeyk mon. Sa yeyk-hu hokwe pau woki nuw-wak ohriar. ³⁸Jisas hiykiaw kokwe yeke mon lwon kwawk, mawk-sow eir mon. Homkwe sa hye kanwei sian nok, hye senkin kiy-me, “Hakamay ara, hreme pa lopruw ley, hunkwe hreme uron pankaw lowk o?”

³⁹Jisas hiykwe loksian nok, howniy ke me-hripahri, seyr hu-par me senkin kiynak-me, “Sopiaw, kwa kueyn-yay.” Seseyn, howniy hok lonkane nok, hu-par hok nonyo keyn.

⁴⁰Jisas hiykwe sa hyo ki-wayh me senkin kiy-mekow, “Homkwe panoke hok o? Homkwe nan kiykiy-ay lopa lwak nonaw nuw-wak o?”

⁴¹Homkwe sa hok, sa homkiaw-ayay senkin seme lohruw, “Uwr ohokwe penkin uwr so? Mo howniy hi, hu-par hi, hyo ok me lonuayk me.”

Jisas hiykwe niohney piap-araw uwr prueyn so owh ko se me-su ha
(*Mat 8:28-34; Luk 8:26-39*)

5 ¹Sa homkwe howk-menki mon lokin peykiyay, Gerasa mo kipay mon.
²Jisas hiy yeyk se lokriy hain menkin, uwr prueyn niohney piap-

^o 4:31 Mastet-i hokwe pokou-i se hieyn.

araw non hiykwé hye lonyay huon e le. Hiykwé uwrsa-sopok me lopru linon kreik yier ko se le. ³Hiykwé uwrsa-sopok me lopru inon kreik yier mon-aw lwayr, seyr uwr prueyn hye liy ma-way-pruwmapruw orok ley. Mo ihey mo mays sen non hi, liy-ar so. ⁴Hyo sune-ihá mokwé, enekwei kraiar sen non po sakreik lokruok, sawk hiykwé enekwei enekwei, sen me leyma-say nok, ain hyo sune ko me okima-kei say ok. Uwr prueyn, krai non hye way-pruwmapruw yay ey hokwé korey lwak pa. ⁵Eypok-arawh eypok arawh, hiykwé uwrsa-sopok me lopru inon kreik yier mon o, mnuw mon o, serey-aw lanio weyr-weyr wonkawkwé wonkawkwé wayr, seyr hyo owh arian se nak-ei prumapru, mein non.

⁶Hiy Jisas se ma lira huon hokwé, hiykwé meiw-á kor-wak, hiykwé sa sau ne nok, Jisas so inour mon pamuow kampueys. ⁷Seyr wouk-ok aiopey non senkin nuwnak-weyr-weyr me, “Jisas, God Seirpey Ayaw-á kor so Ney, hunkwé hane penkin lon ley? Hakwé hne God se hokuaw senkin mesopok, hunkwé hane aw ipey-á peie mon ok o!”^p ⁸Hiykwé senkin sehe me, payhokuaw Jisas hiykwé senkin me, “Niohney piap-araw, uwr ohiy so owh ko se ar-ousne há e!”

⁹Jisas hiy hye mesopok, “Hno uru hokwé poho?” Hiy mekow, “Hano uru hokwé, Ami, payhokuaw, hromkwé ompuay!” ¹⁰Seyr hiykwé Jisas se hme kipay kamon mon mesu-há lopa lwak e hrousohrou nuw-onsey n kraiyá.

¹¹Huok orhey non hokwé mnuw-pawk ohriar serey lanio sayok-á. ¹²Sa niohney piap-araw somokwé Jisas se senkin lonsey n, “Hunkwé hreme huok mo owh mon me-há nok, hreme nak-isay yawriy, huok mo swaw mon.” ¹³Sa Jisas hiykwé hme ipan seme lon há. Homkwé sa uwr sehe lokriy hain nok, huok mo owh mon lyawriy-sawriy. Huok somokwé sa mnuw-pawk má ar-okin sapruw kawkwé nok mon seme nak-onsau onsau kumey ondeys ondeys pruw lowpway. Huok sohom mo meir hokwé sankaw, 2000.

¹⁴Huok-kow-á-uwr homkwé sa hakan sakan nok nok, ok sokwé yier aiopey háy mon o, om paswaw yier aiopey sohiy so meykay mon má lwak sohom o, hme nuw-mesor nakian nakian kow há. Uwrsa homkwé sa seme ley neyney ira, weynpawey n serey má lousne ke. ¹⁵Hom Jisas so owh mon lousne menkin, homkwé sa uwr, paraw niohney piap-araw kraiar non liok hiy wakiawkey n se lira. Hiykwé omeme owh ko po lie, seyr hyo mawkhaw hokwé, yaprué po má-lwak. Homkwé sa seme nuw-hok. ¹⁶Uwrsa me kokwé, yor, uwr niohney piap-araw non se má lousne o, huok o, uwr má lira há hom mesor kow. ¹⁷Homkwé sa Jisas se sehe lonsey n, hmo kipay se lokriy hain e.

¹⁸Jisas hiy yeyk mon lwawkwé menkin, uwr paraw niohney piap-araw non má lwak liok, hiykwé sa Jisas se lonsey n, hiy siraw non-ey e. ¹⁹Sawkwé

Jisas hiykwe hye ipan lon pa, sa hiykwe hye senkin mekow, “Hunkwe a mon ley nok, hne Hakamay hiy pankaw hiy-mon e, seyr uron penkin lowk e, seme hno nioh siraw-aw me kwa mesor kow.”

²⁰Uwr sohokwe sa sehe ley nok, yor, Jisas hiy hye ma hiymon ke Dekapolis mo kipay lowpwarowp mon lanio mesor kow. Uwrsa ma lonuayk homkwe sa uron preiryay.

Sa-ney ma lokrue o, sa hay ma lokuayk o

(Mat 9:18-26; Luk 8:40-56)

²¹Jisas hiy howk-menki mon ma-lokuan menkin, uwrsa popua-hay homkwe, hyo owh mon nuw-hokruw, howk ki-someik mon. ²²Juda mo hokruw-a so hakamay prueyn, Jairus, hiykwe serey le. Hiy Jisas se lira menkin, hiykwe Jisas so sune mon makuayk nok, ²³Jisas se senkin lonseyn kraiy, “Hano ney swanyo nopre hokwe pau lokrue ohriar lwak. Hunkwe hno iha me hoko owh mon kekie e, sa hokwe yaprue ka lwak, seyr su ka lwayr.” ²⁴Jisas hiykwe sa hye nion sehe non-ey. Uwrsa popua-hay hom seyn, siraw nwakwon nwakwon ey, seyr Jisas se nuw-awndiy kaw.

²⁵Sa prueyn hokwe serey non-wak. Hokwe nioh yia sankaw po ley wayr-wayr, iha seys mu nareysyar. ²⁶Hokwe dokta kraiar mo owh mon po nakey, seyr hoko mein-owon lowpwarowp po sasow lowpway. Sawk hok yaprue lwak e ma mon kokwe, hokwe enekwei enekwei piaparaw-ar nuw-wak. ²⁷Hokwe Jisas se ma mesor me lonuayk menkin, hokwe hyo meyki mon uwrsa mo ompok-aw ley nok, hyo saket ke sapou. ²⁸Payhokuaw, hokwe nanpanan, “Hakwe hyo owh ko omeme me-aw sapou ankin, hakwe yaprue po lwak a.” ²⁹Hoko nioh hokwe sa enekwei sohiy nonaw kiynuw-onkane, seyr hokwe senkin lokinhre ir, hoko low kokwe po mon popriy kow.

³⁰Enekwei sohiy nonaw kokwe, Jisas hiykwe senkin nonkway, hyo krai har homkwe hye po lokriy hain. Hiykwe sa uwrsa mo ompok ko se swahre nok, senkin mesopok, “Hano owh ko omeme mokwe, posokwaw sapou so?”^q

³¹Hyo ki-wayh hom lonuayk me, “Hunkwe uwrsa hne ma awndiy kawk seme lira e, hai, hunkwe senkin panoke mesopok o, hne posokwaw sapou so?”

³²Sawk Jisas hiykwe unsaney, hye ma sapou se lira e swahre-ahre ira nonaw lwak. ³³Sa sokukwe weynpaweyn hoko owh mon ma lousne ke lira nonkway menkin, hokwe hok non nak-kowkow ne nok, hye pamuow kampueys nok, ok-ar ke nuw-me-hrorsay kow lowpway. ³⁴Jisas hiy hoke me, “Ney akwa, hno uron hane ma nanpanan kiykiy-ay hiykiaw-aw, hne

^q 5:30 Luk 6:19

po mon popriy kow. Hunkwe liwak marowhway yor non-aw kwa nakey e, seyr hno low hokwe hne ka lokriy hain.”^r

³⁵Jisas hiy lohruw-a non-aw, uwr har Jairus so a ko homkwe le nok, Jairus se mekow, “Hno ney hokwe papo lokrue. Hiy-mon-sorasor-uwr se panoke ma-mon sese-yay o?”

³⁶Jisas hiykwe hmo ok somokwe, lonuayk lopa, sawk Juda mo hokruw-a so hakamay se kiy-me, “Hunkwe peie hok o, kwahnaw nanpanan kiykiy-ay e.”

³⁷Hiykwe uwr sa har me hye nion non-ey e ipan lon lopa, sawk Pita o, Jems o, Jems so nay-ih Jon o, hme-aw me-huonokyaw nok. ³⁸Hom Jairus so a mon lousne menkin, Jisas hiykwe uwr sa hom moryak moryak me amor-ira. Homkwe eheyr aiopey hay nuw-yuk, seyr eheyr-yowp aiopey hay lyuk me. ³⁹Hiy lyawriy nok, hme me, “Homkwe panoke nuw-moryak moryak o? Homkwe eheyr panoke lyuk o? Ney okukwe lokrue pa, hokwe anwaw liawon.”

⁴⁰Homkwe sawk hye kweyr kow. Hiykwe sa uwr sa me ki-apau mon seme me-su ha. Hiykwe sa-ney ko orih pouh uwr sa o, hyo ki-wayh pruompri-ar o, senkinaw huonok nok, ampok, ney hok ma liawon mon hiy-yawriy. ⁴¹Jisas hiykwe sa-ney sohok ko iha ke nekie nok, hoke kiy-me, “Talita kum.” Ok sohok ko meyk-ar kokwe senkin, “Sa-ney paswaw akwa, hakwe hne me, loksian e.”^s

⁴²Enekwei sohiy nonaw kokwe sa-ney sokukwe loksian nok, a mon lanio kwawk. Hoko yia mokwe sankaw, iha seys, mu nareysyar. ⁴³Sawk Jisas hiykwe hom unsaney me mesor kow ame kiynak-me-sous kupaku nok, hme me, sa-ney sokwe ayay har kow-a e.

Nasaret homkwe Jisas se me-puar

(*Mat 13:53-58; Luk 4:16-30*)

6 ¹Jisas hiykwe yier sehe lokriy hain nok, hyo om arian mon ma-le, hyo ki-wayh me nion. ²Sabat-enekwei lwak menkin, hiykwe Juda mo hokruw-a mon uwr sa me God so ok me mesor kow. Uwr sa kraiar homkwe hye lonuayk menkin, homkwe senkin kowkow-yay mesopok, “Ok yaprue somokwe, hiykwe perey suko me lonok mo? Mawkhaw ihay-ar hye ma kow mokwe, penkin mo? Hiykwe meir krai non mokwe, penkin meio o?^t ³Uwr sohokwe a meio uwr hiykwaw, hiykwe Maria ko ney. Hyo uwrku mokwe hreme nion lwak. Hyo nay-ih-nayh Jems, Josep, Judas, Saimon om homkwe. Hyo ine-ih nayh seyn.” Homkwe senkin me menkin, sawk hye sehe me-puar.

⁴Jisas hiy hme kiy-me, “Profet sekwe uru ayaw mon ma lwak hokwe, yier lowpwarowp har hom kow, sawk hyo yier arian o, hyo uwrku arian

^r 5:34 Mak 10:52; Luk 7:50; 17:19 ^s 5:41 Luk 7:14 ^t 6:2 Jon 7:15

o, hyo nioh siraw-aw o, hom korey.”^u ⁵Hiykwe meir krai non mokwe, yier serey mon kokwe, liy meio ley. Sawk peik-uwr har-har-aw me-aw hyo iha non nekie sasowriy sow kow. ⁶Hiykwe kowkow-yay, payhokuaw uwr sa homkwe nan kiykiy-ay pa.

Jisas hiy hyo ki-wayh iha seys mu-nareysyar me ma me-ha hiy non
(*Mat 10:5-15; Luk 9:1-6*)

Jisas hiykwe sa yier har ohriar ma lwak me ley sor kow. ⁷Hiykwe hyo ki-wayh iha seys mu nareysyar non me me-huonok nok, prueys seyn, prueys seyn, senkin me-ha, seyr krai niohney piap-araw me me-su ha ey se nak-kow ha.

⁸Hiykwe sawk hme senkin me-kupaku popriy ha, “Hmo lanio mokwe, irowm me-aw nakey, omeme senkin senkin lopa, ihey mo naw lopa, owk lopa, owk-ney me nowon non lopa. ⁹Sune-owhi me-aw lie nakey, sawk owk ko omeme ohna non peie nakey o.” ¹⁰Hiy hme nak-me kow, “Hme a perey me-huonok yawriy e, serey-aw lwayr, hom yier sehe lokriy hain. ¹¹Yier, hme me-huonok yawriy pa lwak ankin, seyr hme lonuayk pa lwak ankin, homkwe yier sehe lokriy hain nok, kosi-pow hmo sune ko me kiy-our powpow say hain. Sohokwe meir, yier sehe ma lono hiy non.”^v

¹²Ki-wayh homkwe sa seme ley neyney mesor kow, uwr sa hom uron kankoum e. ¹³Homkwe niohney piap-araw kraiar me me-su ha, seyr uwr sa kraiar peik non me wel non low mon popriy kow.”^w

Jon, hu mon prouk uwr so makwey se ma lokiane sow hiy non
(*Mat 14:1-12; Luk 3:19-20; 9:7-9*)

¹⁴King Herot hiykwe sa mey lowpwarowp seme lonuayk, payhokuaw Jisas sekwe om serey serey po mesor nakian nakian. Uwr sa har homkwe senkin me, “Jon, hu mon prouk uwr hiykwe ki-eyh ko se po ma-loksian. Hiykwe krai, meir krai non me meio ey non sehe lwak.”^x

¹⁵Har hom sawk senkin me, “Hiykwe Elaija.” Wo, har homkwe sa senkin me, “Hiykwe profet, profet paraw-uh mo prueyn se hieyn.”

¹⁶Herot hiy lonuayk menkin, hiy me, “Ohokwe Jon, hu mon prouk uwr, uwr hyo hei se ha ma lokiane sow hiy non, sawk hiykwe po ma-loksian.”

¹⁷Jon sekwe mo Herot hiykiaw me-sasay nekie nok, sen non sakawk nok, kalabus-a mon nak-okin sakawk. Hiykwe senkin kokwe Herodias, hyo nay-ih so sah, hiy ma huon ke hokuaw mon. ¹⁸Payhokuaw, Jon, hu mon prouk uwr hiykwe Herot se senkin mekow wayr, “Weynpaweyn sokukwe piap-araw, hwon hno nay Filip so sah ke ma huon sohokwe.”^y ¹⁹Sa Herodias hokwe, Jon se kokwe kasaw sokwe hohuaw, seyr hye

^u 6:4 Jon 4:44 ^v 6:11 Luk 10:4-11; Ap 13:51 ^w 6:13 Je 5:14 ^x 6:14 Mat 16:14; Mak 8:28; Luk 3:19-20 ^y 6:18 Wkp 18:16

lokin kwor okrue e sokwe mon, sawk hokwe liy so. ²⁰Payhokuaw, Herot hiykwe Jon se hok. Hiykwe senkin nonkway, Jon hiykwe uwr yaprue, seyr pekneyweys, sa hiykwe Jon se sehe hiy-mon sosor. Hiykwe Jon so ok mokwe, aiopey hay nanpanan kworpakwor kaw, sawk hiykwe lonuayk e mon.

²¹Sa omok-ar, enekwei kamon Herodias hok yaprue ma lira hiy lousne. Enekwei sohokwe, Herot se ma liwak hiy non. Enekwei sohokwe, Herot hiykwe hyo uwr hakamay o, hyo aw-uwr mo hakamay o, peyrmawk liarok-uwr Galili ko o, hme ayay kraiar lunay kekie kow. ²²Herodias ko ney swanyo hokwe lyawriy nok, owk lowk. Herot o, uwr, ayay hye nion ma non-iwak sir a, homkwe kar ley. King hiykwe sa hoke sokwe me, “Hunkwe pay me lonok e nan o? Hakwe hne kow ey.” ²³Hiykwe hoke kokwe, kraiar senkin loiow me-sakon kaw, “Hakwe senkin loiow, hwon pay-ay se mesopok e, hakwe hne kow ey, mo kipay, ha ma hiy-wayr so kopi aiopey hay hi.”

²⁴Sa-ney sokukwe hoko pouh ko owh mon ma-ley nok mesopok, “Hakwe pay me kiy-mesopok o?” Pouh hok lonuayk me, “Jon, hu mon prouk uwr so makwey se mesopok e.”

²⁵Sa-ney sokukwe king so owh mon masaw-ey nok, omnuw-me, “Hane kokwe Jon so makwey se pokon-awaw plet mon lokiane kwawk nakway kow e.”

²⁶King hiykwe sa uron aiopey hay nuw-owk kworpakwor kaw. Sawk hiy ma loiow o, uwr sa hye nion ma non-iwak sir a o, seme hokuaw kokwe, hiykwe hoke liy me-puar ley. ²⁷Sei, hiykwe sa aw-uwr prueyn se sehe kiysaw-me-sasay ha, Jon so makwey se nake kow e. Aw-uwr sohokwe kalabus-a mon ley nok, Jon so makwey se lokiane sow. ²⁸Hiykwe makwey sohokwe plet non kwawk nake nok, sa-ney sokwe nakway kow. Hokwe sa pouh ke ma-sahre nakway kow. ²⁹Jon so ki-wayh hom lonuayk menkin, homkwe le nok, hyo owhi-sopok ke lway opru kwawk.

Jisas hiy 5000 uwr sa me ma kow-a hiy non

(Mat 14:13-21; Luk 9:10-17; Jon 6:1-13)

³⁰Aposel hom Jisas so mon ma-le-nene nok, mey lowpwarowp hom ma meio o, ma hiymon sorasor o, seme hye mesor kow.^z ³¹Sa uwr sa kraiar hom eriey ley, eriey le, senkin ma lon me hokuaw kokwe, Jisas o, hyo ki-wayh o, homkwe ayay enekwei korey korey kiy-a ley. Sa Jisas hiykwe hyo ki-wayh me seme me, “Hromkwe hromkiaw-aw yier kamon mon ley neyney e, sa homkwe serey liwak nieys ey.”

³²Homkwe sa yeyk non homkiaw-aw seme ley neyney, yier kamon unsaney lopa mon. ³³Sawk uwr sa kraiar homkwe hom ma ley neyney

^z 6:30 Luk 10:17

mokwe, po lira ha, seyr po lira nonkway. Sa uwr̄sa yier lowpwarowp ko homkwe kiaw kiaw-aw seme lonsau onsau nok, sa yier, Jisas hiy ma hiy-ey mon peyrmaw̄k lousne sa-ousne pie. ³⁴Jisas hiy yeyk ko se wakeyn menkin, hiykwe sa uwr̄sa popua hay me lira. Hiykwe sa hme uron lowk, payhokuaw, homkwe sipsip naykih lopa me hieyn. Hiykwe sa pau, hme ok kraiar kiy-hiynuw-mon-sorasor.^a

³⁵Arawh po serey kiy-wak a, hyo ki-wayh homkwe hyo ow̄h mon le nok, me, “Enekwei hokwe pau arawh ohriar kiy-wak, seyr yier ohokwe unsaney lopa.^b ³⁶Uwr̄sa me me-ha e, homkwe wueir-om o, yier o, ohriar erey ma lwak mon ayay ka ley neyney nakway a.

³⁷Saw̄k Jisas hiykwe senkin lonuayk me, “Homkiaw kiy-kow-a e.” Hom mesopok, “Hunkwe hrom ihey mo naw 200 Silva non nakway nok, uwr̄sa eme kow-a, senkin lon e me o?”

³⁸Hiy hme mesopok, “Homkwe ihey mo naw mokwe, pankaw mo? Kwa ley ira.” Hom ley sor ir nok, hye mekow, “They mo naw iha sirom, ay ireys.”

³⁹Sei, Jisas hiy hyo ki-wayh me me, uwr̄sa me hou non hou non pan eir mon me-say kikirweik e. ⁴⁰Uwr̄sa homkwe sa senkin seme kikirweik, hou har 100, hou har 50. ⁴¹Jisas hiy ihey mo naw iha sirom o, ay ireys-ar o, seme lonokyaw nok, nonkumey mon ar-nak-ira nok, God se nak-me-ihey. Hiykwe ihey mo naw seme kamane nok, hyo ki-wayh me kow, uwr̄sa me lowndiy kow e. Hiykwe seyr ay ireys-ar sokwe hme lowpwarowp me nak-kamaun kow. ⁴²Uwr̄sa lowpwarowp hom la menkin, homkwe swaw liy nuwnak-wak. ⁴³Ki-wayh homkwe ihey mo naw o, ay ireys-ar o, seme ma la prue mokwe, yowr iha seys, mu nareysyar, sankaw kaw̄k kreik prusow. ⁴⁴Uwr̄ ayay seme ma la mo meir hokwe, 5000.

Jisas hiykwe hu eir mon lanio keyn

(Mat 14:22-33; Jon 6:16-21)

⁴⁵Jisas hiykwe hyo ki-wayh me yeyk mon kiy-saw-mon waw̄k nok, Betsaida, howk-menki mon ma lwak mon kuan naruok e me-ha. Hiykwe peyr uwr̄sa me me-ha. ⁴⁶Hiy uwr̄sa me me-ihey ha nok, mnuw mon ley, God se mesopok e.^c

⁴⁷Eyrowpwar lwak menkin, yeyk hokwe, howk-iway ompok sok lwak, Jisas hiykwe hiykiaw-aw ki mon lwak. ⁴⁸Hiykwe sa senkin lira, hyo ki-wayh homkwe, youk nuw-hiok lokruok, payhokuaw, howniy hokwe hom ma ley senkin hremon ka-kaye. Sa enekwei 3 klok o, 6 klok o, enekwei sohiy so ompok sok lwak nerie menkin, hiykwe hmo ow̄h mon lousne, hu eir mon lanio ne. Hiykwe hme ka-swaneyk ney e nan. ⁴⁹Saw̄k homkwe hiy hu eir mon lanio se lira, “Ohokwe poūp,” hom nanpanan, sa homkwe

^a 6:34 Nam 27:17; Mat 9:36 ^b 6:35 Mak 8:1-9 ^c 6:46 Luk 5:16

seme nuw-weyr-weyr.^d ⁵⁰Hom lowpwarowp hye lira huon menkin, homkwe nuw-hok krwepakrwe kawk. Sa hmekwe Jisas hiykiaw kiy-sawme, “Krai lwak e, ohokwe hakiaw. Peie hok o.” ⁵¹Sei, hiy hme nion yeyk mon non-wawk, seyr howniy hok lonkane. Ki-wayh homkwe aiopey hay nuw-nanpanan kworpakwor kawk.^e ⁵²Payhokuaw, homkwe 5000 uwr me ma kow-a so meyk-ar hokwe, korey nonkway pa. Hmo uron mokwe po mon kraipakrai yay.

Jisas hiykwe peik-uwrsa Genesaret ko me mon popriy
(*Mat 14:34-36*)

⁵³Hom howk ke lokuan nok, sa Genesaret mon lokin peykyay. Yeyk hokwe homkwe serey piynay. ⁵⁴Hom yeyk ko me wakeyn sakeyn nonaw, uwrsa homkwe Jisas se po saw-ira nonkway. ⁵⁵Sa homkwe kipay lowpwarowp serey ma lwak mon lonsau onsau nok, sa hom hiy perey lwak se lonuayk e, homkwe peik-uwrsa sey non ma linon nok mokwe, serey nakey. ⁵⁶Jisas hiy perey ley me, hiy yier mon ley, om aiopey hay mon ley, wueir-om mon ley, unsaney homkwe uwrsa peik non mokwe, ayay-nakway-yier mon lway nakey neyney. Homkwe Jisas se lonsey, hyo saket ko kopi ke-aw uwrsa peik non me ipan lon sapou e. Sa lowpwarowp hye ma sapou homkwe, yaprue ma-lwak.

Sow senkin senkin, iwey-om hom ma hiymon sorasor hom non
(*Mat 15:1-9*)

7 ¹Farisif o, sow ke hiymon-sorasor uwr har o, Jerusalem ko me ma le nene homkwe, Jisas se am-nuw-awndiy kawk. ²Homkwe senkin lira, Jisas so ki-wayh har homkwe, ayay mokwe, iha orki non nak-a. Suw senkin, homkwe iha mokwe sow hok ma me senkin peyryapeyr pa.^g ³(Payhokuaw, Farisi o, Juda uwrsa lowpwarowp o, homkwe hmo iwey-om hom ma hiymon sorasor me pyay. Homkwe ayay liy saw-a ley, peyr hmo iha me peyryapeyr, hmo sow hok ma me senkin.) ⁴Homkwe ayay nakway yier ko me ma-le-nene ankin, homkwe ayay liy la ley, hom hu perey hawr. Seyr homkwe sow har kraiar hom ma lonok me nak-pyay. Sow senkin, yiaawk o, sospen o, hu-yiaawk aiopey hay o, seme peyryapeyr yor.^h

⁵Farisi o, sow ke hiymon sorasor uwr o, homkwe sa Jisas se sehe mesopok, “Hai, hno ki-wayh homkwe hromo iwey-om hom ma hiymon sorasor hain me pyay pa, panoke lwak o? Wo, homkwe ayay mokwe sawk iha orki non nak-a.”

⁶Jisas hiy lonuayk me, “Okrei-uwr om, Aisaia hiykwe mo okar me, hiy hme profet-ok non senkin ma mey hokwe,

^d 6:49 Luk 24:37 ^e 6:51 Mak 4:39 ^f 7:1 Farisi homkwe Juda-uwr. Homkwe Juda mo sow ke hiymon-sorasor uwr. ^g 7:2 Luk 11:38 ^h 7:4 Mat 23:25

‘Uwrsa omokwe, hano uru hokwe woki nonaw lowk nakie, sawk hmo uron mokwe hano meiauw mon lwak.

⁷ Homkwe hane puraw nuw-kampueys me-ihay lokruok. Seyr hmo sow arian hom ma hiymon sorasor somokwe, homkwe senkin nak-me-loior kow, somokwe God so sow arian.’ *Ais 29:13*

⁸ Homkwe God so me-kupaku-ok mokwe po lokriy ha, sa homkwe uwr ki ko mo sow me nakruok.”

⁹ Jisas hiy hme ma-me, “Hom hmo sow arian me pyay e, God so me-kupaku-ok me meykyay mon ma kekie mokwe, homkwe yerki yaprue-ar non. ¹⁰ Payhokuaw, Moses hiykwe senkin me, ‘Hunkwe hno ipey-aio me yaprue kwa nan ihay,’ seyr, ‘Uwr hyo ipey-aio me posokwaw hruo-yay kow e, hyekwe kwa lokin kwor okruue.’ *Kis 20:12; 21:17; Lo 5:16*

¹¹ Sawk homkwe uwrsa me kokwe yor piap kamon ke senkin hiy-mon sorasor, ney homkwe hmo ipey, aio leys se liy nak-me kow, ‘Ipey, aio leys ama, hakwe hehe liy hiymon ley, payhokuaw, omeme hano, hehe ma hiymon ey mokwe, hakwe korban-ok po me.’” (Ok “korban” sohok ko meyk-ar hokwe senkin, maym, God se kow ey hok non). ¹² “Suw homkwe, uwrsa hom hmo ipey-aio me hiymon ey hokwe, ipan lon pey. ¹³ Hiymon sorasor-ok hom uwrsa har me ma kow somokwe, sa God so ok ke ouon mon kyor-our seipasei ha, hmo apaw-om mo sow arian me-aw lowk nakie e. Seyr homkwe yor kraiar liyliy-aw senkin mokwe, senaw mon.”

Omeme, uwrsa me ma mon orpar orpar hom non

(Mat 15:10-20)

¹⁴ Jisas hiy uwrsa popua hay me ma-me-huonok nok, me, “Hom lowpwarowp kokwe hane kwa lonuayk, seyr kwa nak-nonkway. ¹⁵ Omeme kamon kumay ko unsaney prueyn so swaw mon ma lyawriy hokwe, unsaney sehe liy mon orpar orpar yay ley. Sawk unsaney se ma mon orpar orpar hokwe, omeme hyo uron ko me ma lousne homkwaw.”^{i 16j}

¹⁷ Hiy uwrsa popua hay seme lokriy hain, sa a mon lyawriy menkin, hyo ki-wayh homkwe sa owhnan-ok sohok ko meykyar ke mesopok.

¹⁸ Jisas hiy hme me, “Hmo nonkway mokwe, uwrsa har mo nonkway mo eir mon lwak pey. Homkwe nuw-nonkway pey? Mon kamon kumay ko unsaney so mon ma lyawriy hokwe, hye liy mon orki orki ley.

¹⁹ Payhokuaw, mon sohokwe, uron mon lyawriy pey, sawk swaw mon lyawriy nok, hyo owh ko se ma-lousne ok.” (Jisas hiy senkin ma me hokwe, hiykwe senkin me-kumay, ayay lowpwarowp mokwe, orki lopa.)

²⁰ Hiy ma-me, “Uwrsa mo uron ko pay-ay hiykwaw lousne e, sohiykwaw mon orki orki. ²¹ Payhokuaw, uwrsa mo uron ko mokwe,

ⁱ 7:15 Ap 10:14-15 ^j 7:15 Grik mamey har mokwe ves 16 ke nak-mey: Uwr nweyk non lwak ankin, hiykwe ok seme kwa lonuayk.

yor enkin hom lousne sa-ousne: nanpanan yor piap-araw o, yor orki non o, yokun yor o, unsaney lokin kwor yor o, yokun nweyh kane yor o, ²²ompreir kaw k yor o, yor piap senkin senkin o, okrei yor o, powey powey yor o, lira way ompeys-ma-peys yor o, me-kawrpakawr yor o, nak-me-heyr yor o, owk lapala yor o. ²³Yor piap lowpwarowp somokwe uron ouon ko me lousne, seyr uwrsa me mon orki-oriki-yay.”

Fonia-sa ko nanpanan kiykiy-ay yor
(*Mat 15:21-28*)

²⁴Jisas hiykwe yier sehe lokriy hain nok, Tair mo kipay mon ley. Hiykwe sa a kamon mon lyawriy. Hiykwe hiy serey ma lwak hokwe, uwrsa hom nonkway e mon pa. Sawk hiykwe liy lwak sue ley. ²⁵Sa prueyn, hoko ney swanyo niohney piap-araw non hok Jisas hiy ma lwak se lonuayk menkin, hokwe saw-e nok, hyo sune mon makuayk. ²⁶Sa sokukwe uwrkayn irweyk ko. Hekekwe kipay Fonia, Siria mon ma lwak mon liwak. Hokwe Jisas se lonsey, niohney piap-araw hoko ney ko ow h mon ma lwak se me-su ha e.

²⁷Sawk Jisas hiykwe senkin lonuayk me, “Peyr hromkwe ney me kow-a e. Ney mo ayay me nwoh me lomuwn say kow yor sokukwe yaprue korey.”^k

²⁸Sa sohok lonuayk me, “Hakamay ara, mo nwoh tebol ouon ko hi, homkwe ney mo ayay somei me la.”

²⁹Jisas hiykwe sa hoke senkin mekow, “Hwon senkin ma ma-sahre me ko hokuaw kokwe, hunkwe kwa ley e, niohney piap-araw hokwe, hno ney ke po lokriy hain.”

³⁰Hok a mon ley nok, sa ney hok yop liawon ey mon liawon ke lira. Niohney piap-araw hokwe, hoke po lokriy hain.

Jisas hiy uwr ma lonuayk lopa o, ok ma me lopa o, sehe ma mon popriy hiy non

³¹Sohiy so meyki hokwe, Jisas hiykwe Tair mo kipay se lokriy hain nok, sa Saidon mo kipay mon ley hain, sei, sa howk Galili mon seyn kyor-okumey, Dekapolis mo kipay mon. ³²Unsaney har homkwe uwr prueyn ma lonuayk lopa, seyr ok ma me lopa se hyo ow h mon hiy-e. Sa homkwe hye lonsey, hyo iha ke uwr sohiy so ow h mon kiekie e.

³³Jisas hiy uwr sehe kiy-huonok nok, uwrsa popua hay mo meia w mon hiy-ey. Hiykwe hyo yodne se uwr sohiy so nweyk mon ka-lok-ha nok, somor somor-say nok, uwr sohiy so sane se sapou. ³⁴Sei, Jisas hiykwe nonkumey mon ar-ira nok, lenieys kaw k nok, uwr sehe senkin kiy-me,

^k 7:27 Ow hnan-ok ko meyk kokwe senkin, Juda homkwe ney me hieyn, sa sohok ko uwrku homkwe nwoh me hieyn.

“Efata.” Ok sohok ko meyk-ar hokwe senkin, “Lon-kampi e.”³⁵ Enekwei sohiy nonaw kokwe, uwr sohiy so nweyk hom kiynu-w-on-kamapi, seyr hyo sane hiy kiy-nuw-on-kansopra ha. Sa hiykwe ok yaprue me sasowriy sow ha.

³⁶ Sei, Jisas hiy hom uwr sa har me ma-mesor kow ame nak-me kupaku me-sous, sawk hiy hme kraiar ma me-kupaku hokwe, homkwe kraiar-ar nuw-mesor.¹ ³⁷ Uwr sa ma lonuayk homkwe nuw-preiryay. Hom me, “Hiykwe mey lowpwarowp mokwe yaprue po nuw-meio. Hiykwe uwr ma lonuayk lopa me mon onuayk, seyr uwr ma me lopa me ok mon me.”^m

Jisas hiy uwr sa 4000 me ma kow-a hiy non
(*Mat 15:32-39*)

8 ¹ Enekwei meipey lwak ha lopa, uwr sa poya-poya homkwe ma-hokruw. Hom ayay lopa lwak menkin, Jisas hiykwe hyo ki-wayh me me-huonok nok, me, ² “Hakwe uwr sa eme uron lowk, homkwe hane nion enekwei krompri sankaw lwak. Homkwe ayay lopa.” ³ Hakwe hme hmo a arian mon siowp nonaw me-ha ankin, homkwe yerki mon makuayk sakuayk nok ey, payhokuaw, hmo har homkwe meia-w-ar ko me le-nene.”

⁴ Hyo kiy-wayh hom lonuayk me, “Kipay uwr sa lopa erey mon kokwe, unsaney prueyn hiykwe uwr sa lowpwarowp eme kow-a ey hokwe, ihey mo naw perey suko se lonokyaw ey so?”

⁵ Jisas hiy hme mesopok, “Homkwe ihey mo naw pankaw mo?” Hom lonuayk me, “Iha sirom, mu nareysyar.”

⁶ Hiy uwr sa me ki mon me-wakiawk sir. Sei, hiykwe ihey mo naw iha sirom mu-nareysyar seme lonokyaw nok, God se nak-me-ihey nok, kamane nok, hyo ki-wayh me kow, uwr sa me lowndiy e. Hyo ki-wayh hom seseyn. ⁷ Homkwe seyr ay hu ko paswaw-neyney har non. Jisas hiykwe seyr seme nak-me-ihey nok, hyo ki-wayh me mekow, uwr sa me lowndiy e. ⁸ Uwr sa lowpwarowp homkwe swaw nuw-a mue. Sohiy so meyki hokwe, ki-wayh homkwe ayay kopi kopi mokwe yowr iha sirom mu nareysyar sankaw kaww kreik woki woki. ⁹ Uwr sa ma hokruw mo meir hokwe 4000 ohriar. Sa Jisas hiykwe hme me-ha nok, ¹⁰ hyo ki-wayh me nion yeyk mon lwaww nok, Dalmanuta mo kipay mon ley.

Farisi homkwe meir krai non hme meio mesair kow e mesopok
(*Mat 16:1-4*)

¹¹ Farisi har hom le nok, Jisas se yier-ok non-me. Hye mon ir ey hokwe, homkwe hyekwe meir krai non, God hiy hye kar ma ley se mesair kow ey ke meio e mesopok. ¹² Sawk Jisas hiykwe lenieys kaww nok, me, “Hai, uwr sa pokon ko homkwe, meir krai non me panoke mesopok o? Hakwe

¹ 7:36 Mak 1:43-45 ^m 7:37 Ais 35:5 ⁿ 8:2 Mak 6:34-44

hme ok-ar kiy-mekow, uwr sa omokwe, meir krai non hme mesair kow ey liy kow ley.”^o ¹³Hiykwe sa hme lokriy hain nok, yeyk mon ma-lwawk nok, howk-menki mon ma-lokuan.

Farisi o, Herot o, hmo uron ko piap-araw mokwe yis me hieyn
(*Mat 16:5-12*)

¹⁴Ki-wayh homkwe uron lorionay. Homkwe ihey mo naw kraiar nake pa, sa hme nion kokwe yeyk mon kokwe, imon-awaw. ¹⁵Jisas hiy hme me-kupaku, “Homkwe kwa ehei ehei, seyr Farisi mo yis o, Herot so yis o, seme iray iray non kwa lwak.”^p

¹⁶Hom homkiaw-ayay lohruw-a nok, me, “Hiykwe senkin sehe me, payhokuaw, hromkwe ihey mo naw lopa.”

¹⁷Jisas hiykwe hom pay me lohruw-a e, hiykwe nonkway. Sa hiykwe hme sehe mesopok, “Homkwe ihey mo naw lopa ma lwak me panoke lohruw-a o? Hmey, homkwe korey nuw-ira pey, seyr korey nuw-nonkway pey? Hmey, hmo uron mokwe ku-mein lwak o?”^q ¹⁸Homkwe nene non, sawk lira pey? Homkwe nweyk non, sawk lonuayk pey? Hmey, yor, paraw ha ma mon mokwe homkwe ma-nanpanan pey? ¹⁹Enekwei ha ihey mo naw iha sirom me uwr 5000 me ma kamane kow, hai, ayay kopi kopi mokwe homkwe, yowr pankaw kaw woki woki mo?”

Hom lonuayk me, “Iha seys, mu nareysyar.”^r

²⁰“Seyr enekwei, ha ihey mo naw iha sirom mu nareysyar me uwr sa 4000 me ma kamane kow, hai, ayay kopi kopi mokwe homkwe yowr pankaw kaw woki woki mo?”

Hom lonuayk me, “Iha sirom mu nareysyar.”

²¹Hiy hme mesopok, “Hmey, homkwe peyr korey kiy-nuw-nonkway pey?”

Jisas hiykwe uwr nene kopyo se Betsaida mon mon popriy kow

²²Hom Betsaida mon lousne menkin, uwr sa har homkwe uwr prueyn nene kopyo se hiy-e nok, Jisas se lonseyn, uwr sehe sapou e. ²³Jisas hiykwe uwr nene kopyo sehe iha mon nekie nok nok, yier meykay mon hiy-ey. Hiy uwr sohiy so nene mon somor kekie nok, hyo iha ke uwr sohiy so eir mon nak-kekcie nok, kiy-nak-mesopok, “Hunkwe omeme har pankaw lira o?”

²⁴Uwr sohiy ar-ira nok, kiy-me, “Hakwe uwr sa me lira, sawk homkwe now hom lanio sayok me hieyn lira.”

²⁵Sei, Jisas hiy hyo iha me uwr sohiy so nene mon ma-kekcie. Sa uwr sohiy so nene hom lon-kamapi, sa hiykwe ma-lira, seyr omeme lowpwarowp me yaprue nuw-ira hrahra ha. ²⁶Sohiy so meyki hokwe,

^o 8:12 Mat 12:39; Luk 11:29 ^p 8:15 Luk 12:1 ^q 8:17 Mak 6:52 ^r 8:19 Mak 6:41-44

Jisas hiykwe uwr sehe a mon senkin kiy-nak-me-sous kraipakrai ha, “Yier mon peie ma-lyawriy o.”

Pita hiykwe senkin me-sanion sow, Jisas hiykwe Krai

(Mat 16:13-20; Luk 9:18-21)

²⁷Sei, Jisas o, hyo ki-wayh o, homkwe yier, Sisaria Filipai ohriar mon ma lwak mon ley. Yerki mon kokwe, hiy hme mesopok, “Uwrsa homkwe hanekwe posokwaw ok me o?”

²⁸Hom lonuayk me, “Har homkwe senkin me, hunkwe Jon hu mon prouk uwr. Har homkwe senkin me, hunkwe Elaija, seyr har homkwe senkin me, hunkwe profet prueyn.”^s

²⁹Hiy hme mesopok, “Hai, hom? Homkwe hanekwe posokwaw ok me o?” Pita hiy lonuayk me, “Hunkwe Krai.”^t ³⁰Jisas hiy hye unsaney prueyn se mekow ame hme kiynak-me-kupaku.

Jisas hiy aw nak-ok ey o, lokrue ey o, seme hiykiaw ma lohruw-a hiy non

(Mat 16:21-28; Luk 9:22-27)

³¹Sei, Jisas hiy pa hyo ki-wayh me kiy-hiynuw-mon-sorasor, “Uwrsa mo Ney hiykwe aw kraiar nak-oum ey, seyr Juda mo uwr hakamay o, pris karmay o, sow ke hiymon sorasor uwr o, homkwe hye me-puar ey. Hyekwe ya lokin kwor okrue a, sawk eypok krompri so meyki hokwe, hiykwe su ma-loksian wayr ey.” ³²Hiykwe ok somokwe hmekwe kumayar nuw-mekow, sa Pita hiy hye huonok ohya nok, hye me-hripahri.

³³Sawk Jisas hiykwe lorok swakoum-sow nok, hyo ki-wayh me lira nok, Pita se me-hripahri. Hiy me, “Poup ara, hunkwe hano nene ko se kwa ley. Hno uron ko mokwe, God so mon le pey, sawk uwr so mon le.”

³⁴Sei, Jisas hiykwe uwrsa popua hay o, hyo ki-wayh o, hme me-huonok nok, kiy-me, “Unsaney prueyn hano meyki pyay e mon ankin, hiykwe hiykiaw-ayay lorionay nok, hyo now nak-okin pror kaw okrue ey se lway nok, hane pyay.”^u ³⁵Payhokuaw, unsaney hyo niohney se posokwaw nak-ono sous-a-sous e mon e, hiykwe hyo niohney se mon swakawk ha ey, sawk unsaney hyo niohney se hane hokuaw o, ok-ihey ke hokuaw o, posokwaw mon swakawk kow e, hiykwe hyo niohney se ma-lonok ey. ³⁶Sawk uwr prueyn hiykwe ki ohi so omeme lowpwarowp me nak-swakakar wayr ankin, sa hyo wa hokwe God se nak-nonkway pa lwak ankin, hai, omeme ki ko somokwe omok kokwe hyo wa se kokwe penkin hiymon ey so? ³⁷Seyr hiykwe hyo wa hokwe pay non manon-swawos onok a? ³⁸Enekwei ohokwe yor piap-araw non, seyr uwrsa homkwe God se nanpanan pey. Sa unsaney enekwei ohiy sok hane o, hano ok o, ow-

^s 8:28 Mak 6:15 ^t 8:29 Mak 9:9; Jon 6:68-69 ^u 8:34 Mat 10:38-39; Luk 14:27

mar posokwaw lon e, Uwrsa mo Ney hiykwe Aio so panpaniowni non hyo ensel pekneyweys me nion non-e ankin, hiykwe uwr sehe owh-mar lon ey.”^v

9 ¹Hiy hme makiy-me, “Hakwe hme ok-ar kiy-mekow, hmo har erey ma kiy-nakrok omokwe, lokrue lopa, hom God so Wayr-hre-yier, hiy kraikrai non nake se lira sehe.”^w

Jisas so owh hokwe irweyk eyn lok-sahriy-sow
(*Mat 17:1-13; Luk 9:28-36*)

²Eypok iha sirom pru non so meyki hokwe, Jisas hiykwe Pita o, Jems o, Jon o, hme huonok nok, mnuw meipey hay kamon mon hiy-iau. Serey kokwe homkwe homkiaw-aw lwak. Sa hmo inour mon kokwe, Jisas hiykwe irweyk-aw kiynuw-kahriy-sow. ³Hyo owh ko omeme hom weyspey kiynuw-wak nak-oksa-nweyr-a-nweyr. Unsaney prueyn ki ko omeme seme weyspey-ar liy peyryapeyr ousne ley. ⁴Sei, hom sa Elaija, Moses leys hoh Jisas se nion non-ohruw-a me lira.

⁵Pita hiy Jisas se kiy-me, “Hiymon sorasor uwr ara, hrom erey ma kiy-wak omokwe, yaprue. Hromkwe ey-kroh krompri non meio ey. Kamon hno, kamon Moses so, kamon Elaija so.” ⁶Pita hiykwe ok hiy me ey kokwe, nonkway lwak pa. Payhokuaw, homkwe nuw-hok krwepakrwe.

⁷Sei, waw kamon hok lousne nok, Jisas o, Elaija, Moses leys o, hme swakuwmay. Sa wouk-ok kamon waw ko hokwe senkin me, “Ohokwe hano ney, hakwe hye uron-pi ko-ar nuw-wak. Hye lonuayk e.”^x

⁸Ki-wayh hom saw-swahre-ahre ira, sawk homkwe unsaney prueyn lira pa; hme nion kokwe Jisas hiykwaw non-wak.

⁹Hom mnuw se lokumey-sa-kumey menkin, Jisas hiy hme kiy-me-sous kraipakrai, “Hom pay me lira e, homkwe uwr prueyn se peie mekow o, Uwrsa mo Ney hiy lokrue ko se ma-loksian sehe.” ¹⁰Homkwe sa hyo me-sous kraipakrai-ok ke lonuayk me, sawk homkiaw-aw kokwe ok “lokrue ko se ma-loksian” ko meyk-ar ke lohruw-a nanpanan.

¹¹Sa homkwe Jisas se mesopok, “Hai, sow ke hiymon sorasor uwr homkwe senkin panoke me o, Elaija hiykwe peyrmawk le ey?”

¹²Jisas hiy lonuayk me, “Elaija hiykwe mo peyrmawk sehe le, omeme lowpwarowp me lonhan onhan koruay e. Hai, mamey porih hokwe sawk senkin panoke me ko, Uwrsa mo Ney hiykwe aw kraiar nak-ok ey, seyr hyekwe me-puar ey?”^y ¹³Sawk hakwe hme senkin mekow, Elaija hiykwe po le,^z sa uwrsa homkwe hye kokwe, hom penkin lon e nan e, senkin po lon, God so mamey porih hok hye ma lohruw-a ko liyliy-aw.”^a

^v 8:38 Mat 10:33 ^w 9:1 Mak 13:30 ^x 9:7 Ap 3:22; 2 Pi 1:17-18 ^y 9:12 Sng 22:1-18; Ais 53:3; Mal 4:5 ^z 9:13 Jisas hiykwe Elaija se me memeir, Jon hu mon prouk-uwr sokwe.

^a 9:13 Mat 11:14

Jisas hiykwe nyo prueyn niohney piap-araw non se mon popriy
(*Mat 17:14-21; Luk 9:37-43*)

¹⁴Hom ki-wayh har mo owh mon ma-lousne menkin, homkwe uwrso popua hay hom hme awndiy kawk me ka-ira ne. Seyr sow ke hiymon sorasor uwr homkwe hme yier-ok non-me. ¹⁵Uwrso hom Jisas se lira huon menkin, homkwe nuw-preiryay, sa homkwe hye me-ihey-ok me e lonsau onsau.

¹⁶Jisas hiy hyo ki-wayh me mesopok, “Homkwe uwr seme nion kokwe, yier-ok pay me lon-me o?”

¹⁷Uwr prueyn uwrso popua hay mo ompok ko hiy lonuayk me, “Hiymon sorasor uwr ara, hakwe hano ney se hno owh mon hiy-e. Hiykwe niohney piap-araw non, sa hiykwe ok liy lohruw-a ley. ¹⁸Enekwei niohney piap-araw sohiy hye wanohyay mokwe, hyekwe ki mon lway swasow. Sawn homkwe hyo woki mon hruw-hruw-ay, seyr hiykwe nays nuwnak-peyk kon-kreik nok, owh hiy i nuw-nake ok. Hakwe hno ki-wayh me mesopok, niohney piap-araw sehe me-su ha e, sawk homkwe liy so.”

¹⁹Jisas hiy lonuayk me, “Uwrso nanpanan kiykiy-ay yor lopa ey. Hakwe hme nion kokwe enekwei pankaw non-wak e? Hakwe hmekwe ipan enekwei pankaw lon e? Ney sehe hano owh mon hiy-e e.”

²⁰Sa homkwe nyo sehe hyo owh mon sehe hiy-ey. Niohney piap-araw sohiy Jisas se lira menkin, hiy sa nyo sehe nuw-mon kowkow mon-ma-mon yay. Nyo sohokwe sa ki mon makuayk nokriy-a-nokriy merie merie, seyr sawn homkwe hyo woki mon hruw-hruw-ay.

²¹Jisas hiy ney sohiy so orih se mesopok, “Hai, hiykwe senkin kokwe enekwei pankaw lwak so?”

Hiy lonuayk me, “Hiy ney nopre kor-wak nonaw. ²²Enekwei kraiar niohney piap-araw sohokwe hyekwe ya mon lway swakawk, seyr hu mon lway swakeyn, hye lokin kwor e. Sawk hunkwe liy lwak ankin, hunkwe hreme uron kwa lowk, seyr hreme kwa hiymon.”

²³Jisas hiy hye makiy-mekow, “Hunkwe hanekwe ok senkin sokukwe panoke lohruw-a kow so ‘hunkwe liy lwak ankin’? Unsaney nan kiykiy-ay yor non hiykwe, omeme lowpwarowp mokwe hiykwe liy mon.”^b

²⁴Peypey pa, ney sohiy so orih hiy sa senkin kiynu-wokre me, “Hakwe mo nan kiykiy-ay, sawk aiopey hay korey. Hano nan kiykiy-ay yor ke aiopey hay hiy-mon wak e.”

²⁵Jisas hiy uwrso kraiar hom hme awndiy kawk me lira menkin, hiykwe sa niohney piap-araw se me-hripahri. Hiy me, “Niohney nweyk-saw lopa, seyr woki-ok lopa, hakwe hne kiy-me-kupaku, nyo sohiy so owh ko se ar-ousne ha e, seyr hyo mon peie ma-lyawriy o.”

^b 9:23 Mat 21:21; Mak 11:23

²⁶Niohney piap-araw sohiy nuw-weyr-weyr nok, nyo sehe nuw-mon koukou piap-ma-piap nok, lousne. Nyo sohokwe sopok se hieyn-aw lira, sa uwrsa lowpwarowp homkwe senkin me, “Hiykwe papo lokrue.”^c ²⁷Sawk Jisas hiy hye iha mon nekie nok, hye lway sian, sa hiykwe sehe loksian orok.

²⁸Jisas hiy a mon ma lyawriy so meyki hokwe, hyo ki-wayh homkwe hye ouon-aw mesopok, “Hai, hromkwe niohney sehe me-su ha pa panoke lwak mo?”

²⁹Hiy lonuayk me, “Senkin somokwe God se mesopok yor nonaw me-su ha.”

Jisas hiykwe hyo lokrue ke ma-lohruw-a

(Mat 17:22-23; Luk 9:43-45)

³⁰Homkwe yier sehe lokriy hain nok, sa Galili mo kipay mon ley hain. Jisas hiykwe hom perey lwak e, unsaney prueyn nonkway e mon pa,^d ³¹payhokuaw, hiykwe hyo ki-wayh me hiymon sorasor. Hiy hme me, “Uwrsa mo Ney se kokwe, awia mo iha mon kow ey, sa homkwe hye lokin kwor ey. Sa eypok krompri so meyki hokwe, hiykwe ma-loksian ey.”^e ³²Sawk homkwe hyo ok-ku kokwe nonkway pa, seyr homkwe nak-hok, hyekwe mesopok pa.^f

Peyrmawk kokwe posokwaw lwak o?

(Mat 18:1-5; Luk 9:46-48)

³³Hom Kaperneam mon lousne, sa hiy a mon lwak menkin, Jisas hiykwe hyo ki-wayh me pa kiy-mesopok. “Homkwe yerki mon kokwe pay me lon-seyrpaseyr ne mo?” ³⁴Sawk homkwe hye liy ma-sahre onuayk me e ko, payhokuaw, homkwe yerki mon kokwe peyrmawk posokwaw lwak e, seme homkiaw-ayay lon-seyrpaseyr ne.

³⁵Jisas hiy kiy-iwak nok, hyo ki-wayh iha seys mu nareysyar me kame-huonok nok, kiy-me, “Unsaney peyrmawk lwak e posokwaw mon e, hiykwe lowpwarowp mo pariawey-ar kwa lwak, seyr lowpwarowp mo mey-uwr puraw kwa lwak.”^g

³⁶Hiykwe ney prueyn huonok nok, hmo ompok mon kiy-mon iarok. Hiykwe ney sehe nweyh kane kawok nok, hme kiynak-me, ³⁷“Unsaney, ney ohom mo prueyn se hano uru non posokwaw me-huonok yawriy e, hiykwe hane me-huonok yawriy. Seyr hane posokwaw me-huonok yawriy e, hiykwe hane-aw me-huonok yawriy pey, sawk uwr hane ma me-ha o.”^h

Unsaney hreme aw lono pa posokwaw lwak e, hiykwe hromo

(Luk 9:49-50)

³⁸Jon hiy me, “Hiymon sorasor uwr ara, hromkwe uwr prueyn niohney piap-araw me hno uru non me-su ha me lira, sa hromkwe hye me-sous, payhokuaw, hiykwe hromo prueyn korey.”

^c 9:26 Mak 1:26 ^d 9:30 Jon 7:1 ^e 9:31 Mak 8:31; 10:32-34 ^f 9:32 Luk 9:45 ^g 9:35 Mat 20:25-27; Mak 10:43-44; Luk 22:24 ^h 9:37 Mat 10:40

³⁹Jisas hiy hme mekow, “Hye peie me-sous o, payhokuaw, uwr prueyn meir krai non hano uru non ma meio hiykwe, hane ok-piap-ok liy makiy-saw-me ley. ⁴⁰Payhokuaw, unsaney hreme aw lono pa lwak ankin, hiykwe hromo.ⁱ ⁴¹Hakwe hme okar kiy-mekow, hom Kraiss so ma lwak me hokuaw, unsaney hme hu yiawk non hano uru non posokwaw kow oswa e, hiykwe pie ya lonok a.”^j

Yor piap homkwe nan-kiykiy-ay yor ke mon kuayk

(Mat 18:6-9; Luk 17:1-2)

⁴²“Sawk unsaney har homkwe unsaney, ney ehe hieyn hane ma nan kiykiy-ay me mon-kuayk ankin, uwrsa senkin somokwe yor piap-araw aiopey hay ke nuw-mon. Me o, uwr senkin sohokwe sour-yawp-ar mon paraw mein aiopey hay non huei sok nuw-piynay swakeyn omprok ha lak pok.

⁴³Hno iha hok hne weyn piap-araw mon meio ankin, hunkwe kwa lokiane sow. Hwon God so Wayr-hre-yier mon iha kamon-aw nak-yawriy hokwe, yaprue, sawk Satan so yier, ya ma pros lopa mon iha kreys non nak-yawriy hokwe, piap-araw. [⁴⁴‘Satan so yier sohokwe kiohno hme ma la homkwe seyn lokrue pey, seyr ya hokwe seyn mon pros pey.’]^k ⁴⁵Seyr hno sune hok hne weyn piap-araw ke mon meio ankin, hunkwe kwa lokiane sow. Hwon God so Wayr-hre-yier mon sune kamon-aw nak-yawriy hokwe, yaprue, sawk hne Satan so yier mon sune kreys non nak-way swakawk hokwe piap-araw. [⁴⁶‘Satan so yier sohokwe kiohno hme ma la homkwe seyn lokrue pey, seyr ya hokwe seyn pros pey.’] ⁴⁷Sa hno nene hiy hne weyn piap-araw ke mon meio ankin, hunkwe kwa kair. Hwon God so yier mon nene namon-aw nak-yawriy hokwe, yaprue, sawk hne Satan so yier mon nene nareys non nak-way swakawk hokwe, piap-araw.^l ⁴⁸‘Satan so yier sohokwe kiohno hme ma la homkwe seyn lokrue pey, seyr ya hokwe seyn pros pey.’ *Ais 66:24*

⁴⁹Seyr uwrsa me kokwe ya hok nuw-oum mnow-mnow ihey ey, ayay naws prawk kow ey me sol non ma mon mnow-mnow ihey senkin.

⁵⁰Sol mokwe yaprue, sawk sol hokwe wonor lwak pa lwak ankin, hai, homkwe penkin ma-mon wonor o? Homkwe wayh-wayh me nion non-wawwaw sol non kwa lwak, seyr wayh-wayh me nion aymarowh-aw kwa non-wayr.”^m

Jisas hiykwe sa huon our-swaweyr yay ha yor ke lohruw-a

(Mat 19:1-12; Luk 16:18)

10 ¹Sei, Jisas hiykwe yier sehe lokriy hain nok, sa Judia mo kipay mon ley, yawp Jordan se kuan iau. Uwrsa popua hay homkwe

ⁱ 9:40 Mat 12:30; Luk 11:23 ^j 9:41 Mat 10:42 ^k 9:44 Mat 5:30 ^l 9:47 Mat 5:29

^m 9:50 Mat 5:13; Luk 14:34

hyo owh mon ma-le nene. Sa hiykwe hme hiymon sorasor, hiy ma lon wayr-wayr senkin.

²Farisi har hom le nok, hye mon-ir ey hokwe homkwe senkin mesopok, “Hreme mekow e, hromo sow hokwe uwr prueyn hyo sah ke me-su ha e ipan pankaw lon o?”

³Jisas hiykwe sa mesopok non ma-sahre onuayk me, “Hai, Moses hiykwe hmekwe sow penkin ke kow so?”

⁴Hom me, “Moses hiykwe uwr prueyn, hiy hyo sah ke me-su ha mamey non nak-me-su ha ey hokwe ipan lon.” *Lo 24:1-4*

⁵Jisas hiy ma-sahre onuayk me, “Moses hiykwe hmekwe sow sokukwe sehe mey kow, payhokuaw, hmo uron mokwe ku-mein lwak. ⁶Sawk omeme lowpwarowp me ma monhre pie hokwe, God hiykwe ‘iwar me kokwe, uwr o, sa o, senkin monhre.’ *Stt 1:27; 5:2*

⁷‘Meyk sohiy so hokuaw kokwe, uwr hiykwe hyo aio ipey me lokriy hain nok, hyo sah ke nion non-okin nasay ok, ⁸sa hohkwe owhi kamon-aw non-wak.’ Hohkwe prueys manon-wak pey, sawk kamon-aw. *Stt 2:24*

⁹Sohiy so hokuaw kokwe, God hiy payay se non-saronay e, uwr prueyn hiykwe irweyk irweyk-aw peie ma-mon wak o.”

¹⁰Sa omok hom a mon ma-lwak menkin, ki-wayh homkwe hye ok sokwe mesopok. ¹¹Hiy lonuayk me, “Uwr prueyn hyo sah ke ma me-su ha hiykwe, sa prueyn ma-huon ankin, hiykwe hyo sah ke yokun nweyh kane yor ke mon.” ¹²Liyliy-aw, sa prueyn hoko uruh se ma me-su ha hokwe, uwr prueyn ma-liwak ankin, hokwe yokun nweyh kane yor ke mon.”

Jisas hiykwe God so hiymon yor ke ney nopre me hiy-nekie mesopok
(*Mat 19:13-15; Luk 18:15-17*)

¹³Uwrsa homkwe ney nopre me Jisas so owh mon hiy-e, hiy hme hiy-nekie mesopok e. Sawk hmekwe ki-wayh hom me-hripahri. ¹⁴Jisas hiy senkin lira menkin, hiykwe kasaw nuw-hohuaw. Hiy ki-wayh me me, “Ney nopre me hano owh mon ki-isay ha e, peie me-sous o, payhokuaw God so Wayr-hre-yier hokwe ney nopre senkin mo. ¹⁵Hakwe hme ok-ar kiy-mekow, unsaney prueyn God so Wayr-hre-yier se ney nopre se hieyn lonok pa lwak ankin, hiykwe liy lyawriy ley.”^o ¹⁶Hiykwe sa ney seme nekie lar nok, hyo iha me hmo prueyn prueyn-aw mo eir mon kekie sowkriy nok, God so hiymon yor ke hiy-nekie mesopok.

Uwr warkiayr omeme kraiar non hiy non
(*Mat 19:16-30; Luk 18:18-30*)

¹⁷Jisas hiy ma-ley liok menkin, uwr prueyn hiykwe hyo owh mon sau ne nok, hyo inour mon pamuow kampueys nok, hye mesopok, “Hiymon

ⁿ 10:11 Mat 5:32 ^o 10:15 Mat 18:3

sorasor uwr yaprue ara, ha lwayr peyow ey se lonok ey hokwe, hakwe penkin lon e?”

¹⁸Jisas hiy lonuayk me, “Hai, hunkwe hane kokwe yaprue-ok panoke me o? Uwr prueyn yaprue lopa, God hiykwaw. ¹⁹Hunkwe me-kupaku-ok mokwe nonkway: ‘Unsaney peie lokin kwor okru e o, yokun peie nweyh kane o, yokun peie lopri o, har me okrei, uron-saw-ok non peie lokin lora-lor kow o, har mo omeme me okrei yor non ouon-aw peie me-warei-arei onok o, hno aio ipey me kwa nan ihey.’ ” *Kis 20:12-17; Lo 5:16-20*

²⁰Uwr sohiy me, “Hiymon sorasor uwr ara, me-kupaku-ok somokwe hakwe ney nopre kor-wak nonaw nuw-pyay ne.”

²¹Jisas hiykwwe hye uron-pi ko-ar non nuwnak-ira nok, me, “Hunkwe yor kamon kokwe ohna lwak. Hunkwe ley nok, hno omeme lowpwarowp me isay nakway nok, mein-owon seme uwr sa omeme lopa me kow. Sa nonkumey mon kokwe hunkwe omeme kraiar non lwak ey. Senkin lon nok, hano meyki nak-pyay.”

²²Uwr sohokwe ok seme lonuayk menkin, hiykwwe ine kasaw nuw-ey-kwopakwo nok. Hiy ma ley hokwe, hiykwwe uron nuw-owk nok, payhokuaw, hiykwwe omeme kraiar non.

²³Jisas hiykwwe hyo ki-wayh me lira sahare-ahre nok, hme kiy-me, “Uwr omeme kraiar non hiy God so Wayr-hre-yier mon lyawriy ey hokwe, honon honon nuw-wak ey.”

²⁴Ki-wayh hom ok seme lonuayk menkin, homkwe nuw-preiryay. Sawk Jisas hiy ma-me, “Hano ney om, God so Wayr-hre-yier mon lyawriy ey hokwe honon honon. ²⁵Huok kamon, kamel-ok ma me, hiykwwe ku-i omeme nak-pror ey so saw nopre mon lyawriy e mon ankin, hyekwe honon honon. Sawk uwr omeme kraiar non hiykwwe seyr God so Wayr-hre-yier mon lyawriy e mon ankin, hyekwe honon honon-ar nuw-wak.”

²⁶Ki-wayh hom ok seme lonuayk menkin, homkwe ipey-ar nuw-preiryay. Sa homkiaw-ayay senkin lohruw-a, “Hai, sa uwr penkin me huonok prosue ey mo?”

²⁷Jisas hiy hme lira nok, kiy-me, “Uwr me kokwe sohokwe liy so, sawk God se kokwe honon honon korey, mey lowpwarowp mokwe God hiykwwe liy.”

²⁸Pita hiy Jisas se kiy-me, “Hromkwe omeme lowpwarowp po lokriy hain, hne pyay e.”

²⁹Jisas hiy lonuayk me, “Hakwe hme okar kiy-mekow, unsaney prueyn hyo a, oryay, ine, ipey, aio, ney, wueir, seme hane hokuaw, seyr ok-ihey ke hokuaw lokriy hain ankin, ³⁰hiykwwe enekwei ohokwe kraiar-ar ma-sahre onok ey. Hiykwwe a, oryay, ine, ipey, ney, wueir, seyr low o, somokwe kraiar-ar ma-sahre onok ey, sankaw 100. Seyr enekwei omok kokwe hiykwwe lwayr peyow ey se lonok ey. ³¹Sawk uwr sa kraiar

peyrmawk ma lwak homkwe, pariawey-ar lwak ey, sa pariawey ma lwak homkwe peyrmawk lwak ey.”^p

Jisas hiykwe hyo lokrue ke ma-lohruw-a
(*Mat 20:17-19; Luk 18:31-34*)

³² Jisas o, hyo ki-wayh o, homkwe yerki Jerusalem mon ma liau mon lwak. Jisas hiykwe hmo peyrmawk liarok. Ki-wayh homkwe kraiar nanpanan, seyr uwrса meyki ma pyay homkwe nuw-hok. Jisas hiy hyo ki-wayh iha seys mu nareysyar me nian-aw huonok nok, weyрpaweyn hye lousne ey me mesor kow. ³³ Jisas hiy me, “Kwa lonuayk, hromkwe Jerusalem mon liau. Sa Uwrса mo Ney se kokwe, pris karmay o, sow ke hiymon-sorasor uwr o, hmo iha mon kow ey. Homkwe hye lokin kwor ey se nuw-ohruw-a sakon kawк nok, hye uwrkayn irweyk mo iha mon kow ok. ³⁴ Uwrkayn irweyk homkwe hye lourde nok, somor somor say kow nok, lomniy nok, lokin kwor okrue ok. Sawk eypok krompri so meyki hokwe, hiykwe su ma-loksian wayr ey.”^q

Jems, Jon leys hohkwe uwr peyrmawk lwak e mesopok
(*Mat 20:20-28*)

³⁵ Sebedi so ney prueysyar, Jems, Jon leys hohkwe hyo owh mon le nok, me, “Hiymon sorasor uwr ara, hrorkwe hne hror pay me mesopok e, hwon senkin lon e mon.”

³⁶ Jisas hiy hme kiy-mesopok, “Hai, hohkwe ha hehe pay me lon kow e me o?”

³⁷ Hoh lonuayk me, “Enekwei hwon hno sia-king hno Wayr-hre-yier panpaniowni non mon ma lwak mon liwak ankin, hunkwe hrerekwe prueyn sayar mon, prueyn irayh mon, senkin isay iwak e.”

³⁸ Jisas hiy hme me, “Hohkwe hoh pay se mesopok e, nonkway lwak pey. Hai, hohkwe yiawk ha lowswa ey hokwe, liy lowswa o? Hai, hohkwe hane prouk ey, senkin liy prouk o?”^r

³⁹ Hoh lonuayk me, “Hrorkwe liy.”

Jisas hiy hehe me, “Okar, yiawk ha lowswa ey hokwe, hohkwe seyr ya non-owswa a. Seyr hehekwe hane prouk ey, senkin ya prouk a.”^s ⁴⁰ Sawk hakwe uru lopa, unsaney hano sayar mon liwak ey o, hano irayh mon liwak ey o, seme liaup ey hokwe. Yop somokwe uwrса God hiykiaw ma lonhan kow koruay mo.”

⁴¹ Ki-wayh iha seys hom senkin lonuayk menkin, homkwe sa Jems, Jon leys se kasaw nuw-hohuaw. ⁴² Jisas hiy hme lowpwarowp me swa-hokruw nok, kiy-me, “Homkwe nonkway, haiden homkwe uwr hmo

^p 10:31 Mat 20:16; Luk 13:30 ^q 10:34 Mak 8:31; 9:31 ^r 10:38 Mak 14:36; Luk 12:50
^s 10:39 Ap 12:2; MHO 1:9

hiy-wayr uwr-ok ma me so krai ouon mon lwak, seyr hmo peyrmawk liarok uwr homkwe hiy-wayr krai lowpwarowp non.^t ⁴³Sawk hmo ompok mon kokwe senkin lwak pey. Uwr hmo ompok mon uru aiopey hay non posokwaw lwak e mon e, hiykwe hmo mey-uwr puraw kwa lwak.^u ⁴⁴Seyr uwr peyrmawk lwak e posokwaw mon e, hiykwe lowpwarowp mo mey-uwr puraw kwa lwak kow. ⁴⁵Payhokuaw, Uwrsa mo Ney hiykwe sehe le pa, uwrsa hom hyo mey me meio kow e. Sawk hiykwe sehe le, hiykwaw uwrsa me meio kow e, seyr hiykiaw-ayay uwrsa kraiar me pie se hieyn nakway preisia ha e.”

Jisas hiykwe, uwr nene kopyo Bartimeus se mon popriy
(*Mat 20:29-34; Luk 18:35-43*)

⁴⁶Sei, hom sa Jeriko mon le. Jisas o, hyo ki-wayh o, uwrsa popua hay o, hom yier aiopey hay sehe kiy-okriy hain nonaw, uwr prueyn nene kopyo Bartimeus-ok ma me, Timeus so ney hiykwe yerki meykay mon wakiaw lonsey. ⁴⁷Bartimeus hiy senkin lonuayk menkin, uwr sohokwe Jisas Nasaret ko, hiy pau ok aiopey hay kiynuw-okre me, “Jisas, Dedit so Ney, hane uron lowk e.”

⁴⁸Uwrsa kraiar homkwe sa hye me-hripahri, seyr hye meinkiwaw-lwak e nak-me. Sawk hiykwe aiopey hay-ar nuw-okre me, “Dedit so Ney, hane uron lowk e.”

⁴⁹Jisas hiy am-kusarok nok, kiy-me, “Ka-me-huonok e.” Sa homkwe uwr nene kopyo sehe sehe ka-me, “Kar ley kara, loksian kara, hiykwe hne me.” ⁵⁰Hiykwe hyo saket ke swasow nok, loksian nok, Jisas so owh mon le.

⁵¹Jisas hiy hye mesopok, “Hunkwe hne ha penkin lon kow e mon o?” Uwr nene kopyo sohiy me, “Hiymon sorasor uwr ara, hakwe ma-lira e mon.”

⁵²Jisas hiy hye me, “Kwa ley kara, hno nanpanan kiykiy-ay yor hokwe hne po mon popriy.” Uwr sohokwe enekwei sohiy nonaw kiy-nuw-ira, sa hiykwe Jisas se yerki mon pyay nok.”

Jisas hiykwe Jerusalem mon kokwe, king se hieyn lyawriy
(*Mat 21:1-11; Luk 19:28-40; Jon 12:12-19*)

11 ¹Hom yier Jerusalem ohri-ar sok lwak menkin, sa yier sowpwareney Betfage o, Betani o, mnuw Oliv mon ma lwak mon lousne. Sa Jisas hiykwe hyo ki-wayh prueysyar se peyrmawk me-ha. ²Hiy hme kiynak-me, “Hohkwe yier hoho inour mon ma lwak seriey ley e. Hoh yier serey lyawriy ankin, hohkwe donki-ney kamon ma piynay orok se lira ey. Donki-ney sohokwe peyr uwr prueyn lie iwak nak-anio pa.

^t 10:42 Luk 22:25-26 ^u 10:43 Mat 23:11; Mak 9:35 ^v 10:52 Mak 5:34

Hohkwe kahrer nok, erey hiy-e. ³Seyr uwr prueyn hehe senkin mesopok ankin, “Hohkwe senkin panoke lon o?” Hye senkin kwa me-kow, “Hakamay hiykwe mey non, po masaw-hiy-e a.”

⁴Hohkwe sa seme ley, sa donki-ney kamon yerki mon lwak se lira, a yerki-wouk kamon mon piynay. Hoh donki-ney sehe kahrer menkin, ⁵uwr sa har serey ma nakrok hom mesopok, “Hohkwe penkin lon o, donki-ney sehe ma kahrer sohokwe?”

⁶Hohkwe sa Jisas hiy hehe ma mekow senkin lonuayk me. Uwr sa somokwe sa hehe seme isay ha. ⁷Hohkwe donki-ney sehe Jisas so owh mon hiy-e nok, hmo saket me donki-ney so eir mon linon say nok, Jisas hiy donki-ney so eir mon ar-iwak. ⁸Sa uwr sa ompuay homkwe hmo omeme owh ko me yerki mon seyp okronay nok, sei, har homkwe now-kueim wueir ko me ka-okiam a okyaw nok nok, yerki mon seyp okronay. ⁹Uwr sa peyr ma ley o, meyki ma pyay o, hom lowpwarowp sa yu senkin nuwnak-aun sian me,

“God se lowk nakie e. Uwr, Hakamay so uru non ma le ohokwe, God hiy ka hiy-mon ihey.

¹⁰God hiykwe king Devit, hromo aio so Wayr-hre-yier ma le se hyo hiymon yor ke ka kow. God se kokwe ayaw-ar mon lowk nakie e!”

Sng 118:25-26

¹¹Jisas hiy Jerusalem mon lyawriy nok, God so a mon lyawriy nok, omeme lowpwarowp me lira sahare-ahre. Sawk eyrowpwar ma lwak se hokuaw, hiykwe sa ki-wayh iha seys mu nareysyar me nion Betani mon ley wayr nayr.

Jisas hiy now fik se ma hruo som kaw k hiy non

(Mat 21:18-19)

¹²Leikmon, hom Betani se lokriy hain menkin, Jisas hiykwe siowp lokrue. ¹³Hiykwe now fik kamon ma kraiar non meiw mon lwak se lira, sa hiykwe i non lwak ame ley ira liok. Sawk hiy ohriar lwak menkin, hiykwe ma me-aw lira, payhokuaw sohokwe fik-i leip enekwei korey.”

¹⁴Jisas hiy now fik sehe kiy-me, “Unsaney prueyn hno i me ma-la ey korey.” Hiy senkin ma me hokwe, hyo ki-wayh homkwe lonuayk.

Jisas hiykwe uwr, omeme God so a mon ma nak-way me me-su ha

(Mat 21:12-17; Luk 19:45-48; Jon 2:13-22)

¹⁵Hom Jerusalem mon lousne menkin, Jisas hiykwe God so a mon ley nok, uwr sa omeme serey ma nakway o, omeme serey ma isay nakway o, seme me-su ha. Hiykwe mein-owon me non-sawos uwr mo tebol o, woukmow me ma isay nakway uwr mo sia o, seme koum say kow nok,

^w 11:13 Luk 13:6

¹⁶unsaney prueyn se, omeme God so a-yier mon hremon linon nakeyneyney hain e ipan pase lon e. ¹⁷Sei, hiykwe sa uwrsa me senkin hiymon sorasor,

“Mamey porih mon kokwe God hiykwe senkin me, ‘Hano a hokwe, uwrsa kipay lowpwarowp ko mo God se mesopok-a ok me ey.’ Sawk homkwe yokun-uwr mo lwon-kwawk sue a po mon ousne.”

Ais 56:7; Jer 7:11

¹⁸Pris karmay o, sow ke hiymon sorasor uwr o, hom senkin lonuayk menkin, hom pau yerki har Jisas se lokin kwor ey me kiynuwpawk. Homkwe Jisas se hok, payhokuaw uwrsa popua hay somokwe, Jisas so hiymon sorasor yor ke nuw-preiryay nanpanan.^x

¹⁹Eyrowpwar-ar lwak menkin Jisas o, hyo ki-wayh o, homkwe yier aiopey hay Jerusalem se lokriy hain.

Now-fik so ok ko meyk-ar

(Mat 21:20-22)

²⁰Leikmon leison hokwe, hom yerki se ley menkin, homkwe sa now fik se lira. Now fik sohokwe papo som, meyk sok som ha sohokwe, suwr. ²¹Pita hiykwe sa sehe ma-nanpanan, sa Jisas se sehe kiy-me, “Hiymon sorasor uwr ara, kwa lira, now fik hwon ma hruo-yay kow hokwe papo som.”

²²Jisas hiy lonuayk me, “God se nanpanan kiykiy-ay e. ²³Hakwe hme ok-ar kiy-mekow, hmo prueyn mnuw ehe senkin posokwaw me e, ‘Hunkwe lok-sian nok, hunkiaw-ayay sour-yawp-ar mon maka-lway swakeyn,’ seyr hiykwe uron imnok amnok nan lopa, seyr senkin nakanpanan kiykiy-ay ankin, hiy pay se me e, suw mo senkin lousne, suw hyekwe mo senkin lousne.^y ²⁴Sohiy so hokuaw kokwe, hakwe hme senkin mekow, hom God se pay se mesopok e, homkwe senkin nanpanan kiykiy-ay e, homkwe po lonok, sa hom pay se mesopok e, suw hmekwe mo kow.^z ²⁵Enekwei hom God se pay se lorok mesopok e, homkwe unsaney prueyn hme yor piap penkin ke mon e, hyekwe sehe lorionay kow e, hmo Aio nonkumey mon ma lwak hiy hmo yor piap me ka lorionay kow.”^{a 26 b}

Jisas so hiy-wayr kraik se ma mesopok hiy non

(Mat 21:23-27; Luk 20:1-8)

²⁷Hom yier Jerusalem mon ma-lousne, sa Jisas hiy God so a mon lanio kwawk nonaw, pris karmay o, sow ke hiymon sorasor uwr o, uwr hakamay o, homkwe Jisas so owh mon le nok, ²⁸hye mesopok, “Mey

^x 11:18 Mak 14:1 ^y 11:23 Mat 17:20 ^z 11:24 Mat 7:7 ^a 11:25 Mat 6:14-15 ^b 11:25 Grik mamey har ves 26 ke nak-mey peykyay: Sawk homkwe lorionay kow yor lopa lwak ankin, hmo Aio nonkumey ko hiy seyn, hmo yor piap-araw me liy lorionay kow ley.

hwon ma meio somokwe, hunkwe hiy-wayr krai penkin non meio o? Hai, hnekwe mey seme meio ey hokwe, hiy-wayr krai posokwaw kow so?”

²⁹Jisas hiy lonuayk me, “Hakwe hme mesopok kamon senkin mesopok ey. Homkwe hane mekow ankin, mey ha ma meio mokwe, hakwe hiy-wayr krai penkin non meio e, hakwe hme mekow ey. ³⁰Jon so hu mon prouk mey kokwe, God so mon po le pak, uwr ki ko mo owh ko ke po le pak?”

³¹Homkwe homkiaw-aw lohruw-a nok, me, “Hromkwe penkin kiy-mey mo? Hrom senkin me ankin, ‘God so mon le’, hiykwe sa senkin kiy-mesopok a, ‘Hai, homkwe sa Jon so ok me nanpanan kiykiy-ay pa panoke lwak mo?’ ³²Sawk hrom senkin me ankin, ‘Unsaney ki ko mo owh ko ke le,’ uwr sa popua hay homkwe sa hreme aw lono lak.” (Homkwe uwr sa me hok, payhokuaw uwr sa lowpwarowp homkwe senkin nanpanan, Jon hiykwe mo profet.)

³³Sa homkwe Jisas se senkin seme mekow, “Hromkwe nonkway lwak pey.”

Jisas hiy me, “Ha seyn, mey, ha ma meio mokwe, hakwe hiy-wayr krai penkin non meio e, hakwe hme liy mekow ley.”

Uwr wain-wueir mon ma meio mo owhnan-ok

(*Mat 21:33-46; Luk 20:9-19*)

12 ¹Jisas hiykwe sa hmekwe owhnan-ok har non lohruw-a, “Uwr prueyn hiykwe wain-i wueir meio saro. Hiykwe wain-wueir se hir nak-yay hir-a-hir kwawk nok, ki-saw-eyh wain-i me lour ompos kreik ey se lopru nok, i-a liarok ira ey se nak-meio. Sei, hiykwe wain-wueir sehe wueir meio saro uwr mo iha mon kow hain nok, ki meia-aw mon nakey anio. ²Wain-i me loun hriaw enekwei lwak menkin, hiykwe hyo mey-uwr prueyn se me-ha, wueir meio saro uwr mo owh mon, hyo liy arian se ley onokyaw kow e. ³Sawk homkwe hye nekie nok, hye lomniy mamniy nok, puraw-aw ma-me-ha. ⁴Sei, wueir-yaup-uwr hiy mey-uwr prueyn hmo owh mon ma-me-ha. Wueir meio saro uwr somokwe hye makwey mon lokin pror-ma-pror kaw nok, hye nuw-mon owh-mar owh-mar yay. ⁵Sei, hiy prueyn se ma-me-ha, sa homkwe hyekwe lokin kwor. Hiy har me ma-me-ha, seyr senkin-awaw lon. Har mokwe kwahnaw lomniy ha, har mokwe lokin kwor-ma-kwor.

⁶Hiy me-ha ey hokwe uwr prueyn-aw-aw lwak prosue, hyo ney uron-pi ko-ar hiy non. Pariawey-ar hokwe, hiykwe hye me-ha. Hiy me, ‘Homkwe hano ney se mon komnow komnow ey.’

⁷Wueir meio saro uwr homkwe sawk homkiaw-aw lohruw-a, ‘Ohokwe wueir-yaup-uwr so ney arian. Oue, hromkwe hye lokin kwor e, sa hyo

© 12:1 Ais 5:1-2

omeme mokwe hromo ka lwak.’⁸ Homkwe sa hye sehe sakawk nok, lokin kwor nok, hyo owhi sopok ke wueir-sow mon lway swasow.”^d

⁹Jisas hiy mesopok, “Hai, wueir-yiaup-uwr, hiykwe penkin lon a? Hiykwe le nok, uwr seme lokin kwormakwor nok, wain-wueir se uwr har me ma-sahre me-kow ok. ¹⁰Hmey, homkwe God so mamey porih ko ok, enkin ma me ke, pankaw lira mesor?

‘Mein, a meio uwr hom ma me-puar hokwe, ipey-ar po lousne, a se hiymon kraipakrai ey.’

¹¹Hakamay hiykwe senkin meio, sa sohokwe hromo nene mon kokwe ihey-ar nuw-wak.’” *Sng 118:22-23*

¹²Uwr hakamay Juda ko homkwe, sa Jisas se nekie e mon liok, payhokuaw, homkwe senkin nonkway, hiykwe owhnan-ok sokukwe hme me-memeir. Homkwe sawk uwrsa popua hay me hok, sa homkwe hye lokriy hain nok, ley.

Takis nakway mey ke ma mesopok hiy non

(Mat 22:15-22; Luk 20:20-26)

¹³Farisi mo uwr har o, Herot so sune non har o, hmekwe Jisas so owh mon me-ha, Jisas se mesopok non, mon noweyn ir e.^e ¹⁴Homkwe Jisas so owh mon le nok, me, “Hiymon sorasor uwr ara, hromkwe nonkway, hunkwe okar-ar me mekow. Hunkwe uwrsa hom penkin nanpanan e, seme seyn nan kworpakwor pey. Hunkwe unsaney hom penkin uwr lwak e, seme seyn nanpanan pey, sawk hunkwe God so uron ko me, okar-ok hok ma me ko liyliy-aw hiymon sorasor. Hunkwe hreme kwa mekow, Sisar se takis nakway yor kokwe hromo sow hokwe ipan lon o? Hmey, hromkwe hme nakway e, lwak e?”

¹⁵Sawk Jisas hiykwe hmo okrei yor sokukwe papo nonkway. Hiy mesopok, “Homkwe hane panoke mesopok noweyn ir o? Homkwe silva imon hane kwa kow, ha lira ley.”

¹⁶Hom Jisas se silva imon nake kow nok, Jisas hiy hme mesopok, “Hai, uwr ine-kasaw ohiy o, uru o, poso mo?”

Hom sa Jisas se senkin lonuayk me, “Sisar so.”

¹⁷Jisas hiy me, “Sisar se kokwe omeme Sisar so ma lwak me kwa kow, seyr God se kokwe omeme God so ma lwak me kwa kow.”

Homkwe sa hye preiryay.^f

Lokrue-uwr hom loksian ankin, sa liy ma-huon o?

(Mat 22:23-33; Luk 20:27-40)

¹⁸Sei, Sadyusi, senkin ma me, uwrsa ma lokrue homkwe ma-loksian lopa, hom Jisas so owh mon le nok, mesopok,^g ¹⁹“Hiymon sorasor uwr

^d 12:8 Hi 13:12 ^e 12:13 Mak 3:6 ^f 12:17 Ro 13:7 ^g 12:18 Ap 23:8

ara, Moses hiykwé hremekwé senkin mey kow, ‘Uwr prueyn hiykwé hyo sah ke ney lopa lokrue okriy hain ankin, hyo nay-ih hiykwé sa-win sokwé kwa ma-huon. Sa nay-ih hiykwé ney kekíe ankin, ney somokwé oryay-ih ma lokrue so ney ok me.’ *Lo 25:5*

²⁰Suw senkin, uwr eynay orhey non mokwé, iha sirom mu nareysyar non, senkin lwak. Peyr sa kokwé oryay-ih hiykiaw huon pie. Sa hiykwé ney lopa lokrue. ²¹Sei, nay-ih hyo meyki ko hiy sa-win sokwé ma-huon, sawk hiykwé seyr ney lopa lokrue. Nay-ih sohiy so meyki ko seyn, liyliy-aw lon. ²²Sei, senkin-awaw, uwr eynay iha sirom mu nareysyar non somokwé sa sokwé-aw ney lopa nuw-huon okrue-sa-okrue. Pariawey-ar kokwé sa hok lokrue. ²³Hai, uwr sa ma lokrue ha, hom su ma-loksian wayr ankin, sa sokukwé poso sa lwak ey ko? Uwr eynay iha sirom mu nareysyar somokwé hoke-aw nuw-huon.”

²⁴Jisas hiy lonuayk me, “Homkwé piap eyn nuw-nanpanan. payhokuaw, homkwé God so mamey porih o, God so krai o, sohom mo kamón kokwé nonkway pey. ²⁵Uwr sa ma lokrue ha hom ma-loksian ankin, homkwé ensel nonkumey ko me hieyn lwak ey. Uwr homkwé sa ma-huon lopa, seyr sa homkwé uwr ma-liwak lopa. ²⁶Hai, uwr sa ma lokrue ha hom su ma-loksian wayr se ma lohruw-a hokwé, homkwé ok, sapa-pruw ya ma loum, Moses so Mamey mon ma lwak ke lira mesor pa ko? Serey kokwé senkin mey, God hiykwé Moses se senkin me, ‘Hakwé Abraham so God, seyr Aisak so God, seyr Jekop so God.’ *Kis 3:6*
²⁷Hiykwé lokrue mo God korey, sawk uwr sa inaw ma lwayr mo God.^h Homkwé piap eyn nuw-nanpanan ohruw-a.”

God so sow seirpey-ar peyrmawk ko hok non
(*Mat 22:34-40; Luk 10:25-28*)

²⁸Sow ke hiymón sorasor uwr prueyn hiykwé serey lwak. Hiykwé ok, hom ma lohruw-a seme lonuayk. Hiykwé senkin lira, Jisas hiykwé Sadyusi me kokwé yaprue ma-sahre onuayk me. Hiykwé Jisas se mesopok, “Hai, me-kupaku-ok seirpey-ar, me-kupaku-ok lowpwarowp mo peyrmawk ma liarok kokwé pohok non ko?”ⁱ

²⁹Jisas hiy lonuayk me, “Me-kupaku-ok seirpey-ar, me-kupaku-ok lowpwarowp mo peyrmawk ma liarok kokwé senkin: ‘Israel om, kwa lonuayk, Hakamay hokwé hromo God Hakamay hiykwaw-aw. *Lo 6:4-5*
³⁰Homkwé Hakamay, hmo God se kokwé uron-pi ko-ar kwa nuw-wak, hmo uron lowpwarowp non, hmo wa lowpwarowp non, hmo mawkhaw lowpwarowp non, seyr hmo krai lowpwarowp non.’ ³¹Me-kupaku-ok seirpey kamón peyr ko ko meyki ma lwak kokwé senkin: ‘Hunkwé hno

^h 12:27 Abraham o, Aisak o, Jekop o, hromo uron hokwé senkin nan, papo lokrue, sawk God hiykwé senkin nan pey, homkwé inaw lwak. ⁱ 12:28 Luk 10:25-28

wayh-wayh me uron-pi ko-ar kwa nuw-wak, hunkiw-ayay uron-pi ko-ar ma lwak, senkin.’ Me-kupaku-ok seirpey kamom, me-kupaku-ok kreysyar sohom mo eir mon kokwe korey lwak pey.” *Wkp 19:18*

³²Sow ke hiymon sorasor uwr hiy Jisas se kiy-me, “Yaprue-ar, hiymon sorasor uwr ara. Ok, hwon ma me somokwe, okar-ar. God hokwe mo Hakamay hiykaw-aw, seyr God kamom lopa, sawk hiykaw-aw. ³³Hunkwe God se uron-pi ko-ar kwa nuw-wak, hno uron lowpwarowp non, hno mawkhaw lowpwarowp non, seyr hno krai lowpwarowp non. Seyr hunkwe hno om-wayh se uron-pi ko-ar kwa nuw-wak, hunkiw-ayay uron-pi ko-ar ma nuw-wak senkin. Me-kupaku-ok kreysyar seme lonuayk me hokwe, ipey-ar, ayay o, omeme o, seme God se ma naws prawk kow mo eir mon lwak.”

³⁴Jisas hiy uwr sohiy so mawkhaw ihey-ar non lonuayk me se lira menkin, hiykwe sa uwr sehe senkin me, “Hunkwe God so Wayr-hre-yier hokwe meiw lwak pey.” Sohiy so meyki hokwe unsaney prueyn Jisas se pase ma-mesopok e, payhokuaw, homkwe hye nak-hok.

Krais hokwe poso ney so?
(*Mat 22:41-46; Luk 20:41-44*)

³⁵Jisas hiy God so a mon hiymon sorasor nonaw, hiykwe senkin mesopok, “Hai, sow ke hiymon sorasor uwr homkwe senkin panoke me o, Krais hiykwe Devit so ney-nona? ³⁶Devit hiykiaw kokwe God so Niohney so kueur senkin me: ‘Hakamay hiykwe hano Hakamay se senkin me: Hano sayar mon kiy-iwak, peyr ha hno awia me hno sune ouon mon yay sowkriy kow sehe.’ *Sng 110:1*

³⁷Devit hiykiaw kokwe hye kokwe, ‘Hakamay’ ok me. Hai, senkin lwak ankin, Krais hiykwe Devit so ney-nona penkin lwak a?”

Uwrsa popua hay homkwe Jisas so ok mokwe kar nonaw lonuayk.

³⁸Hiy hiymon sorasor nonaw, Jisas hiy me, “Homkwe sow ke hiymon sorasor uwr me iray iray non kwa nak-wak. Ow h ko omeme meipey hay me lie nak-anio sayok weynpaweyn kokwe, hmo. Seyr hme maket-yier mon uwrsa hom me-ihey-ok me yor kokwe, hmo. ³⁹Homkwe seyr Juda mo hokruw-a mon kokwe yop ipey-ar mon akre akre liwak sir. Ayay hokruw a enekwei seyn, homkwe yop ihey-ar mon liwak sir pie. ⁴⁰Homkwe seyr sa-win mo a me nak-swakakar, seyr hom God se mesopok mokwe, homkwe nuw-mesopok meime, hme uwrsa hom lira e. Uwr senkin somokwe, God hiykwe ipey-ar nuw-omniy mamniy ey.”

Sa-win prueyn hokwe God se mein-owon kow
(*Luk 21:1-4*)

⁴¹Jisas hiy God so a pekney-weys mon mein-owon kaw krek yop ohriar mon liwak nonaw, hiykwe uwrsa mein-owon ma kaw krek seme

^j 12:33 Lo 4:35; Hos 6:6

liwak ira. Uwrsa omeme kraiar non homkwe mein-owon kraiar kaww kreik. ⁴²Saww sa-win prueyn omeme lopa hok le nok, kopa ireysyar paswaw-neyney nopre, 10 toea ko meir me kaww kreik.

⁴³Jisas hiykwe hyo ki-wayh me me-huonokyaw nok, me, “Hakwe hme ok-ar kiy-mekow, sa-win omeme lopa okukwe omeme kraiar-ar kaww kow, uwrsa har lowpwarowp mo eir mon.^k ⁴⁴Uwrsa kraiar homkwe hom meinowon kraiar non ma nak-wak me kow. Saww hok omeme lopa ma lwak kokwe, hokwe hoko omeme lowpwarowp kekue su mon wayr ey me kow lowpway.”

Jisas hiykwe low piap-araw omok lousne ey me lohruw-a

(Mat 24:1-14; Luk 21:5-19)

13 ¹Jisas hiy God so a se lokriy hain menkin, hyo ki-wayh prueyn hiy kiy-me, “Hiymon sorasor uwr ara, seyn lira, a ihey-ihey ey, mein-awp mein-awp ey.”

²Jisas hiy lonuayk me, “Hunkwe a aiopey hay lowpwarowp omokwe pankaw lira o? Mein kamon erey suko hiykwe hyo yop mon liy ma-lwak ley. Mein lowpwarowp somokwe ya kyor-inon say ha a.”^l

³Jisas hiy Mnuw Oliv, God so a se ma ka-iawon ira mon wakiaww nonaw, Pita o, Jems o, Jon o, Andru o, homkiaw-aw hyo owh mon le.

⁴Hom hye mesopok, “Hreme mekow e, weynpaweyn somokwe pohiy sok lousne ey mo? Hai, meir penkin hom lousne ey mo, hreme senkin mesair kow ey hokwe, enekwei weynpaweyn senkin hom lousne ey hokwe po kiy-e?”

⁵Sa Jisas hiy hme kiy-me, “Homkwe iray iray non kwa lwak, hme uwr prueyn hiy senaw me-loior kow. ⁶Uwr kraiar homkwe hano uru non ya le a. Homkwe senkin me ey, ‘Hakwe mo uwr sohiy non,’ sa uwrsa kraiar me me-loior kow ey. ⁷Hom aw lono ok ohriar mon lonuayk, aw lono ok anyan meiw mon lonuayk, homkwe peie hok o. Weynpaweyn somokwe mo lousne ey, saww enekwei pariawey-ar hokwe peyr lwak se. ⁸Kipay kamon hiykwe kipay kamon se nion non-ono ey. Yier kamon hiykwe yier kamon se nion non-ono ey. Ki serey serey mon kokwe, kina le ey, seyr siowp lokrue ey. Weynpaweyn somokwe sa, ney sumow ma swaun, hok ya non ma nak-oum pie ke hieyn.

⁹Homkwe iray iray non kwa lwak. Hmekwe nekie nok, kot mon hiy-ey ok. Hmekwe Juda mo hokruw-a mon lomniy mamniy ey. Homkwe hiy-wayr uwr o, king o, hmo inour mon hane hokuaw ok-ihey ke mesor ke hme mesor kow e inakrok ey.^m ¹⁰Saww enekwei pariawey hiy lousne lopa non kokwe, God so ok-ihey kokwe peyr uwrsa kipay lowpwarowp ko me mesor kow. ¹¹Seyr hme kot mon nekie nok hiy-ey ankin, homkwe ok,

^k 12:43 ² Ko 8:12 ^l 13:2 Luk 19:44 ^m 13:9 Mat 10:17-20

hom me ey me peie lowk kworpakwor kaw k o. Enekwei sohiy non kokwe, hme ok penkin me kow e, homkwe seme kwa me, payhokuaw ok hom ma me somokwe hmo nian korey, somokwe Niohney Pekneyweys so mon le ey.ⁿ

¹²Uwr eynay hiykwe hyo uwr eynay se me-loior kow lokin kwor ey. Seyr aio hiykwe ney se liyliy-aw meio ey. Ney homkwe hmo ipey aio me aw lono ey, seyr hme isay okin kwor-ma-kwor ey.^o ¹³Uwrsa lowpwarowp homkwe hme awnie awnie-aw ya lira a, hano uru se hokuaw kokwe. Sawk uwrsa posokwaw lorok kraiy e, enekwei pariawey hiy nuw-ousne, hmekwe ya huonokyaw prosue a.^p

Ompay piap-araw hiykwe ya lousne a

(*Mat 24:15-28; Luk 21:20-24*)

¹⁴“Homkwe omok ompay piap-araw kyai mon piapay ey non hiy ampok kamon hiy uru lopa mon lyawriy iarok se lira ey.” (Unsaney mamey okwe ma lira mesor hiykwe ok sohok ko meykyar ke kwa nuw-nonkway popriy). “Homkwe senkin lira ankin, sei, uwrsa Judia mon ma lwak homkwe mnuw mon kwa hakan sakan nok.^q ¹⁵Uwr prueyn hyo a-suwr mon ma liwak hiykwe, a mon omeme kamon lonok e peie ma-lyawriy o.^r ¹⁶Unsaney wueir mon ma lwak hiykwe, a mon peie ma-ley o, hyo saket ke lway e. ¹⁷Enekwei somokwe sa ney swaw non o, sa, ney mu la ey o, hmekwe piaparaw-ar nuw-wak ey.^s ¹⁸Homkwe God se kwa mesopok kraiy, weynpaweyn somokwe weyp-nono enekwei sok lousne lopa ka lwak. ¹⁹Payhokuaw, enekwei sohom mo low piap-araw somokwe piaparaw-ar, low enekwei God hiy ki se ma monhre pie non ma lousne ha, enekwei ehe om-nak-our sapeykyay, low sohom mo eir mon lwak. Sawk omok seyn, senkin ma-lousne lopa.^t ²⁰Sa Hakamay hiykwe enekwei somokwe haraw mon wak pa lwak hokwe, unsaney prueyn inaw liy lwayr ley. Sawk uwrsa hiykiaw ma lahan iaup me hokuaw kokwe, hiykwe enekwei somokwe haraw sehe mon wak.

²¹Enekwei sohokwe uwr prueyn hiy hme senkin me ankin, ‘Lira Krai ehe,’ seyr ‘Lira, Krai ehie,’ homkwe peie nanpanan kiykiy-ay o. ²²Payhokuaw, okrei-krai o, okrei-profet o, homkwe ya lousne sa-ousne a. Homkwe meir krai non o, meir suwon o, seme ya meio ousne a, uwrsa God hiykiaw ma lahan iaup me mon warei-arei ey hokwe, sa okrei-uwr somokwe liy lwak ankin.^u ²³Sohiy so hokuaw kokwe, homkwe iray iray non kwa lwak. Ok lowpwarowp mokwe hakwe hmekwe enekwei sohiy lousne lopa non po mesor kow koruay.”

ⁿ 13:11 Luk 12:11-12 ^o 13:12 Mat 10:21 ^p 13:13 Mat 10:22; Jon 15:21 ^q 13:14 Dan 9:27; 11:31; 12:11 ^r 13:15 Luk 17:31 ^s 13:17 Luk 23:29 ^t 13:19 Dan 12:1; MHO 7:14
^u 13:22 MHO 13:13

Jisas hiy ma ma-le enekwei hokwe nonkway lopa

(Mat 24:29-31; Luk 21:25-28)

²⁴Sawk enekwei weynpaweyn piap-araw sohom mo meyki hokwe, 'ey hiykwe, eym-nawp krwere-krwere lwak ey. Yeyn hokwe seyr mayar lopa.

²⁵Napuar homkwe non ko me lon-kamair kuayk-sakuayk ey. Omeme krai ipey-ar nonkumey ko homkwe wei-a-wei ey.' *Ais 13:10; 34:4*

²⁶Sei, Uwrsa mo Ney hiy lousne ok. Hiykwe waw non nak-aye ey, krai ipey-ar non, seyr panpaniowni non.^v ²⁷Hiykwe hyo ensel me ki so por iha-iaha-aw mon me-ha ey, uwrsa God hiykiaw ma lahan iaup, ey kaie mon, ey kuakeyn mon, senkin ma lwayr sahare-ahre me me-huonokyaw e."^w

Now fik se kwa lira nonkway

(Mat 24:32-35; Luk 21:29-33)

²⁸"Homkwe weynpaweyn kamon now fik se kwa mon-sorasor nonkway. Hyo kueim hom pruam-norku eyn lwak ankin, seyr hyo ma hom kowp-kowp ousne-sa-ousne pie ankin, suw homkwe senkin nonkway, sohokwe ay leip enekwei ohriar. ²⁹Seyr liyliy-aw eyn lwak, hom weynpaweyn senkin hom lousne me lira ankin, homkwe senkin nonkway ey, enekwei hokwe pa ohri-ar. ³⁰Hakwe hme okar kiy-mekow, weynpaweyn somokwe uwrsa enekwei enkin ma kiy-wayr hom lokrue lowpway lopa non lousne ey. ³¹Nonkumey o, ki o, ya lira por ha a, sawk hano ok kokwe lira por ha lopa."

Weynpaweyn sohom mo enekwei-ar hokwe liy nonkway ley

(Mat 24:36-44)

³²"Eypok sohiy o, aua sohiy o, unsaney prueyn nonkway pey, mo ensel nonkumey ko hi, mo Ney hiykiaw hi, sawk Aio hiykiaw-aw nonkway. ³³Homkwe kwa nakrok ira kraipakrai. Seyr homkwe iray iray non kwa lwak. Payhokuaw, homkwe enekwei sohiy le ey hokwe, homkwe nonkway lwak pey. ³⁴Enekwei sohokwe uwr prueyn hiy hyo a se yier meiauw mon ley e ma lokriy hain se hieyn. Hiykwe mey-uwr prueyn prueyn-aw mo mey me kow lowpway, seyr a-yerki-wouk mon liarok-uwr se mekow hain, hiy iray-iray nonaw lwak e.

³⁵Sohiy so hokuaw kokwe, homkwe iray iray non kwa lwak, payhokuaw, hunkwe nonkway lwak pey, a-yiaup-uwr hiy ma-le enekwei hokwe. Hiykwe eyrowpwar ma-le pakane, arawh-orieyn sok ma-le pakane, woyo hok me non ma-le pakane, ey hiy lonir lonir non ma-le

^v 13:26 MHO 1:7 ^w 13:27 Mat 13:41; Mak 13:32

pakane.^x ³⁶Sa hiy masaw-e ankin, hiykwe hnekwe anwaw liawon se ka-ira ne pa ka lwak. ³⁷Ok, ha hme ma mekow somokwe, hakwe uwrsa lowpwarowp me me-kow, ‘Kwa lorok ira kraipakrai.’”

Juda mo uwr hakamay hom Jisas se ouon-aw lokin kwor e ma lonsan hom non
(*Mat 26:1-5; Luk 22:1-2; Jon 11:45-53*)

14 ¹Enekwei pau kreys-aw kiy-wak, Pasova o, ihey mo naw yis lopa la ey^y o, hom lousne ey hokwe. Pris karmay o, sow ke hiymon sorasor uwr o, homkwe yerki Jisas se ouon-aw nekie lokin kwor ey se pawk. ²Hom me, “Hromkwe uwrsa hom enekwei God se kampueys me-ihey e ma hokruw non peie nekie o, sa uwrsa homkwe hreme aw lono lak.”

Sa prueyn hokwe sanda prawk ihey-ar non se nonay kow, Jisas so owh mon
(*Mat 26:6-13; Jon 12:1-8*)

³Jisas hiykwe Betani mon lwak, Saimon, uwr paraw owh peik piaparaw non ma lwak so a mon. Jisas hiy ay liwak-a nonaw, sa prueyn hokwe sanda ihey-ar yiwak non, mein-owon kraiar non ma nakway se nak-yawriy. Yiwak hokwe mein alabasta non meio. Hokwe yiwak sehe nekie kaun nok, sanda se Jisas so makwey mon swanon-yay kow.^z

⁴Uwr har serey ma non-wak homkwe sa kasaw hohuaw, sa homkiaw-ayay senkin me, “Sanda sohokwe puraw-aw panoke nonay hihir say o? ⁵Sanda sohokwe uwr har me isay nakway hokwe, mein-owon sankaw po lonok, 300 silva, seyr mein-owon somokwe uwrsa omeme lopa me po lowndiy kow.” Sa homkwe hoke nays-ok nuw-me-hripahri yay.

⁶Sawk Jisas hiy me, “Heke kwa lokriy hain. Homkwe hoke panoke lonpeys me o? Hokwe hane mey ihey-ar ke meio kow. ⁷Homkwe uwrsa omeme lopa non senkinaw-aw lwak wayr ey, sa homkwe hme enekwei pohiy sok hiymon e mon e, homkwe liy hiymon. Sawk hakwe hme nion senkinaw-aw non-wak lopa. ⁸Hokwe mey hok liy ma lwak ke meio. Hok sanda hano owh mon ma nonay kow kokwe, hano owhi ke lopru kwawk ey se lonhan onhan koruay.^a ⁹Hakwe hme ok-ar kiy-mekow, ok-ihey ke kipay lowpwarowp mon perey mesor e, hoke ma-nanpanan ey hokwe, yor hok ma mon kokwe, seyr nak-mesor ey.”

Judas hiy Jisas se ma wei kow hiy non
(*Mat 26:14-16; Luk 22:3-6*)

¹⁰Sei, ki-wayh iha seys mu nareysyar mo prueyn, Judas Iskariot hiykwe pris karmay mo owh mon ley, Jisas se hme wei kow e. ¹¹Pris karmay hom

^x 13:35 Luk 12:38 ^y 14:1 Ok Pasova ko meyk-ar kokwe senkin, God so ensel hiy Isip mo yier mon ma laye nayr hokwe, hiykwe senkin lon, a-yerki nioh non me ka-ira ne ankin, hiykwe a sohokwe lokriy hain. Enekwei arawh sohokwe seyr Israel mo uwrsa homkwe ihey mo naw yis lopa me la nayr. ^z 14:3 Luk 7:37-38 ^a 14:8 Jon 19:40

senkin lonuayk menkin, homkwe kar nuw-ey, seyr hye mein-owon kow e nak-me-loray. Sa Judas hiykwe yerki, hiy yaprue ma lira se sehe pawk, Jisas se hmo iha mon kow ey se.

Jisas hiykwe Pasova-ayay hyo ki-wayh me nion non-iwak a
(*Mat 26:17-25; Luk 22:7-14,21-23; Jon 13:21-30*)

¹²Enekwei peyr-ar ko, ihey mo naw yis lopa me la ey, seyr sipsip-ney Pasova enekwei sok la ey me ma lokin kwor-ma-kwor hiy lousne menkin, Jisas so ki-wayh hom hye mesopok, “Hunkwe hremekwe hno Pasova-ayay mokwe perey ley unay-a kow e mon o?”^b

¹³Sa Jisas hiykwe hyo ki-wayh prueysyar se sehe me-ha, seyr senkin nak-mesor-a-sor kow ha, “Hohkwe taun mon kwa lyawriy. Uwr prueyn yowr hu non hiykwe hehe lonyay ey. Hohkwe hye kwa pyay ha.

¹⁴Hohkwe a hiy ma lyawriy so a-yiaup-uwr se senkin kwa mesopok, ‘Hiymon sorasor uwr hiykwe senkin me, ampok, ha hano ki-wayh me nion Pasova-ayay me la ey hokwe poho?’ ¹⁵Sa hiykwe hehekwe ampok aiopey hay kamon eir mon ma lwak se mesair kow ey. Ampok sohokwe po lonhan onhan koruay, seyr po huwhay koruay. Hohkwe hromo ayay mokwe serey kwa lunay-a kekue sowkriy.”

¹⁶Ki-wayh prueysyar hoh non-ey nok, om aiopey hay mon lyawriy. Omeme lowpwarowp mokwe hohkwe Jisas hiy ma mekow ha senkin lwak me lira. Sa hohkwe Pasova-ayay mokwe sehe lunay kekue.

¹⁷Ey hiy kuakeyn lopay menkin, Jisas hiy hyo ki-wayh iha seys mu nareysyar me nion pa non-e. ¹⁸Sa hom ayay liwak sir a nonaw, Jisas hiy hme kiy-me, “Hakwe hme okar kiy-mekow, hmo prueyn hane nion ma kiynon-a ohokwe, hane wei kow ey.”^c

¹⁹Ki-wayh homkwe sa uron nuw-owk kworpakwor, sa hom lowpwarowp kokwe hye prueyn prueyn-aw senkin mesopok, “Hmey, ha korey pak?”

²⁰Jisas hiy lonuayk me, “Mo hmo iha seys mu nareysyar mo prueyn ihey mo naw hane nion yowr mon ma non-sakeyn prouk-a hiy non. ²¹Uwrsa mo Ney hiykwe hye, God so mamey porih hok ma lohruw-a, senkin lokrue ey. Sawk uwr, Uwrsa mo Ney se ma wei kow sokwe piap-araw lwak ey. Hyo pouh hokwe hye liwak pa lwak hokwe, yaprue-ar po lwak.”

Ayay, Hakamay so owhi o, nioh o, seme ma memeir hom non
(*Mat 26:26-30; Luk 22:15-20; 1 Ko 11:23-25*)

²²Hom la nonaw, Jisas hiykwe ihey mo naw ke lonok nok, God se nak-me-ihey nok, kamane nok, hyo ki-wayh me lowndiy. Hiy nak-me kow, “Kwa lonok, ohokwe hano owhi.”

^b 14:12 Kis 12:6 ^c 14:18 Sng 41:9

²³Sei, hiy yiawk wain-hu non se nakway nok, God se nak-me-ihey nok, hme nakway kow, sa hom lowpwarowp lowswa. ²⁴Hiy hme me-kow, “Ohokwe hano nioh, uwrsa kraiar me ma swanon sow kow hiy non, seyr God so sokior-ok ke ma nak-mon kraipakrai hiy non.”^d ²⁵Hakwe hme okar kiy-mekow, hakwe wain-hu ohokwe liy ma-lowswa ley, enekwei ha wain-hu iwon se God so Wayr-hre-yier mon lowswa sehe.”

²⁶Sei, hom yayh kamon lowk nok, mnuw Oliv mon ley neyney.

Pita hiy Jisas se nonkway lopa ok ma me hiy non

(*Mat 26:31-35; Luk 22:31-34; Jon 13:36-38*)

²⁷Jisas hiy hme me, “Hmo lowpwarowp homkwe hane hakan sakan okriy hain ey, payhokuaw God so mamey porih hokwe mo senkin me, ‘God hiykwe sipsip-kow-a-uwr se lokin kwor ey, sa sipsip homkwe irweyk irweyk-aw hakan sakan ey.’ *Sek 13:7*”

²⁸Sawk ha ma-loksian so meyki hokwe, hakwe hmo peyrmawlk ley naruok ey, Galili mon.”^e

²⁹Pita hiy lonuayk me, “Mo hno ki-wayh lowpwarowp hom hne lokriy hain hi, hakwe hne liy lokriy hain ley.”

³⁰Jisas hiy Pita se kiy-me, “Hakwe hne ok-ar kiy-mekow, pokon arawh kokwe kakaruk hiy ok enekwei kreys me lopa non kokwe, hunkwe enekwei krompri hane nonkway lopa-ok senkin me ey.”

³¹Sawk Pita hiykwe senkin ma-lonuayk me kraiaiy, “Hakwe hne nonkway lopa ok liy me ley, mo ha hne nion non-okrue hi.” Ki-wayh lowpwarowp hom seyr liyliy-aw lohruw-a.^f

Jisas hiykwe God se me-sopok, Getsemani mon

(*Mat 26:36-46; Luk 22:39-46*)

³²Hom yier Getsemani-ok ma me mon lousne menkin, Jisas hiykwe hyo ki-wayh me senkin me, “Homkwe erey kiy-kikrweik, hakwe God se mesopok ley.”^g ³³Hiykwe senkinaw me-huonok, Pita o, Jems o, Jon o, seyr hiykwe pau uron kiy-nuw-owk kworpakwor kaw, seyr nuw-hok krwepakrwe. ³⁴Hiy hme mekow, “Hano uron hokwe, low nuw-hei, sa hane mon okrue eyn lwak. Homkwe erey mon kwa lwak, seyr kwa kikrweik ira kraipakrai.”^h

³⁵Hiykwe meiaiw eyn kakor-ey popor nok, God se senkin mesopok, sa liy lwak ankin, aw nak-ok enekwei sohokwe hiykwe lonok lopa ka lwak. ³⁶Jisas hiykwe senkin mesopok, “Aio, hano Aio, mey lowpwarowp mokwe hunkwe liy meio. Hunkwe yiawk aw nak-ok ey, hano mon ma

^d 14:24 Kis 24:8; Sek 9:11; Jer 31:31-34 ^e 14:28 Mat 28:16; Mak 16:7 ^f 14:31 Jon 11:16

^g 14:32 Jon 18:1 ^h 14:34 Jon 12:27

lwak ehe kwa lonok nakey. Sawk hunkwe hano uron ko so meyki peie pyay o, sawk hno uron ko so meyki kwa pyay.”ⁱ

³⁷Sei, hiy hyo ki-wayh mo owh mon ma-ley menkin, hiykwe hmekwe anwaw lwon sowkway me ka-ira ne. Hiy Pita se kiy-me, “Saimon, hunkwe anwaw liawon o? Hunkwe aua kamon inaw lwak ira kraipakrai pa panoke lwak o?” ³⁸Hiy hme kiy-me, “Inaw kwa lwak ira kraipakrai, seyr homkwe mon-ir mon makuayk sakuayk lopa lwak e God se kwa mesopok. Okar, hmo niohney homkwe mey meio e mon, sawk hmo owhi mokwe nompou lwak.”

³⁹Hiy ma-ley nok, God se ok liyliy-aw nonaw ma-mesopok. ⁴⁰Hiy ma-ley menkin, hiykwe hmekwe anwaw lwayr me maka-ira ne, payhokuaw, hmo nene mokwe leyhon. Sa homkwe hyekwe penkin ok ma-kiy-me ley.

⁴¹Jisas hiy enekwei krompri se ma-le menkin, hiy hme me, “Homkwe anwaw lwayr sowkway nieys nonaw lwak o? Sankaw-aw, aua hokwe po kiy-e, Uwrsa mo Ney sekwe pau uwr yor piap-araw non me wei kow. ⁴²Kwa loksian sasian, hromkwe ley e. Seyn lira, uwr hane ma wei kow hiykwe ehe.”

Enekwei Jisas se ma nekie hiy non

(Mat 26:47-56; Luk 22:47-53; Jon 18:3-12)

⁴³Jisas hiy ok me nonaw, Judas, hyo ki-wayh prueyn hiy pa lousne. Hye nion kokwe uwr kraiar hom non-e. Homkwe aw-seik o, aw-now o, senkin nake. Hmekwe pris karmay o, sow ke hiymon sorasor uwr o, uwr hakamay o, hom me-ha.

⁴⁴Wei-kow-uwr hiykwe uwr hye nion ma non-e somokwe, meir kamon ke non-me-sakon kaw, “Uwr, ha ma way neyr-a-neyr hokwe mo hiy. Hye kwa nekie, seyr iray iray non kwa hiy-ey.” ⁴⁵Judas hiy kiynuw-ousne menkin, hiykwe Jisas so owh mon saw-ey nok, senkin me, “Hiymon sorasor uwr,” sei, hye nak-way neyr-a-neyr. ⁴⁶Uwr sohom Jisas se nekie nok, nuw-nweyh sakon kaw popriy. ⁴⁷Sawk hmo prueyn serey ma lorok hiykwe hyo seik ke kandwos nok, Pris Makwey-uwr so mey-uwr so nweyk ke lokian-pru sow kow.

⁴⁸Jisas hiy me, “Hmey, hakwe sow me kamaun sow uwr so, hom hane aw-seik o, aw-now o, sohom non ma nake nekie ohokwe? ⁴⁹Eypok lowpwarowp, hakwe mo hme nion non-wak, God so a mon hiymon sorasor, sa homkwe hane pase nekie e. Sawk God so mamey porih hokwe okar ka me e hokuaw.”^j

⁵⁰Sei, ki-wayh lowpwarowp homkwe hye lour-swahis yay hain nok, hakan sakan.

⁵¹Uwr warkiayr prueyn, omeme owh ko weyspey ke ma lie hiykwe Jisas so meyki lonsu nok. Homkwe sa hye nak-nekie liok, ⁵²sawk hiykwe hyo owh ko omeme ke swasow hain nok, apaw-aw hakan sau nok.

ⁱ 14:36 Mak 10:38; Jon 6:38 ^j 14:49 Luk 19:47; 21:37; Jon 18:20

Jisas hiy kaunsil mo inour mon ma liarok hiy non

(Mat 26:57-68; Luk 22:54-71; Jon 18:13-24)

⁵³Sohiy so meyki kokwe, homkwe Jisas se Pris Makwey-uwr so owh mon hiy-ey, sa pris karmay o, uwr hakamay o, sow ke hiymon sorasor uwr o, homkwe serey nuw-hokruw. ⁵⁴Pita hiykwe meiaw meiaw-aw lonsu ne nok, Pris Makwey uwr so a-yier mon nuw-yawriy. Serey kokwe hiykwe aw-uwr me nion non-wakiawkeyn nam nayr, ya mon.

⁵⁵Pris karmay o, Juda mo uwr hakamay lowpwarowp o, homkwe honsi, Jisas hiy ma mon me pawk, hom honsi seme hokuaw Jisas se lokin kwor e, sawk homkwe pase lirway e. ⁵⁶Uwr kraiar homkwe okrei-ok me me-hrorsay, Jisas se lokin kwor e, sawk hmo ok mokwe liyliy-aw lwak pa.

⁵⁷Sei, uwr har hom loksian nok, Jisas se lokin kwor e okrei-ok okwe lohruw-a hrsorsay kow. ⁵⁸“Hromkwe hiy senkin me se lonuayk, ‘Hakwe God so a, uwr hom ma meio se kros kuayk ey, sa eypok krompri non-aw kokwe, God so a kamon, uwr hom ma meio lopa se ma-meio ey.’”^k ⁵⁹Sawk mo hom seyn, hmo ok mokwe liyliy-aw lwak pa.

⁶⁰Pris Makwey-uwr hiykwe hmo lowpwarowp mo inour mon loksian iarok nok, Jisas se mesopok, “Hunkwe uron-saw-ok hne ma lohruw-a omokwe lonuayk me lopa lwak ey so?”

⁶¹Sawk Jisas hiykwe meinkiowp-aw lwak. Hiykwe ok kamon me pa. Hai, Pris Makwey-uwr hiy makiy-mesopok, “Hmey, hunkwe Krai so, God hrom ma me-ihey so Ney so?”

⁶²Jisas hiy lonuayk me, “Oo, homkwe Uwrsa mo Ney hiy God Seirpeyar so iha sayar mon liwak se ya lira a, seyr waw nonkumey ko non nak-aye se ya lira a.”

⁶³Pris Makwey-uwr hiykwe hyo owh ko omeme me nekie seyr-say nok, me, “Hai, hromkwe uron-saw-ok sankaw ma-lonuayk e mon o?”

⁶⁴Homkwe hyo ok-piap-ok mokwe po kiy-onuayk. Homkwe penkin kiy-nanpanan o?”

Sa hom lowpwarowp, hye heyn-non-ok me, hye lokin kwor e.^l

⁶⁵Hmo har hom pau, Jisas se somor kiy-nuw-somor say kow, sei, hyo nene me way pruw-ma-pruw sous nok, hye iha non lomniy. Hom nak-me, “Hunkwe profet-ok kwa me-hrorsay kora.” Sa hyekwe aw-uwr hom huonok nok, lomniy mamniy.

Pita hiy Jisas se nonkway lopa-ok ma me hiy non

(Mat 26:69-75; Luk 22:56-62; Jon 18:15-27)

⁶⁶Pita hiy a-yier mon lak-wakiawkeyn nonaw, Pris Makwey-uwr so mey-sa prueyn hok pa le. ⁶⁷Hok Pita hiy ya mon wakiawk nam se lira

^k 14:58 Jon 2:19-21 ^l 14:64 Wkp 24:16; Jon 19:7

menkin, hokwe hye nuw-ira loway loway nok, kiynuw-me, “Hwon seyn, Nasaret-uwr Jisas se nion non-wak.”

⁶⁸Sawk hiykwe me warei-arei. “Hakwe nonkway lopa, hakwe ok hwon ma kiy-ohruw-a somokwe, nonkway lwak pey.” Hiykwe senkin lonuayk me nok, a-yerki-wouk mon ley. Sei, sa kakaruk kamon hiy ok kiynuw-me.

⁶⁹Mey-sa hok hye serey lira menkin, hok uwr serey ma nakrok seme makiy-mekow, “Hiykwe mo ki-wayh prueyn.” ⁷⁰Sawk Pita hiykwe ma-me warei-arei.

Kiy-kor-popor ha menkin, uwr ohriar ma nakrok hom Pita se makiy-me, “Okar, hunkwe mo hmo prueyn, payhokuaw, hwon seyn, Galili ko.”

⁷¹Pita hiy pau, hiykiaw-ayay kiynuw-hruo yay kow, seyr hme kiynuw-oiow me-kow, “Hakwe uwr, hom ma lohruw-a sohokwe, nonkway lwak pey.”

⁷²Sei, enekwei sohiy nonaw kokwe, sa kakaruk hiy ok makiy-nuw-me, sa Pita hiykwe ok, Jisas hiy ma-me ke ma-nanpanan. “Kakaruk hiy ok enekwei kreys non me lopa non kokwe, hunkwe enekwei krompri, hane nonkway lopa-ok me ey.” Hiykwe sa ehey-aw kiynuw-yuk.

Jisas se Pailat so owh mon ma hiy-ey hiy non

(Mat 27:1-2,11-14; Luk 23:1-5; Jon 18:28-38)

15 ¹Leisnon arawh-aw kokwe, pris karmay o, sow ke hiymon sorasor uwr o, Juda mo kaunsil lowpwarowp o, homkwe aheyr aheyr nonaw saw-hokruw nok, ok saw-ohruw-a sakon kawk. Homkwe Jisas se sen non way-pruw-ma-pruw nok, nekie owk nakey nok, hye Pailat so iha mon kow.^m

²Pailat hiy Jisas se mesopok, “Hunkwe Juda mo king so?”

Jisas hiy lonuayk me, “Mo sehe, hunkiaw ma kiy-me se.”

³Pris karmay homkwe Jisas se uron-saw-ok weynpaweyn kraiar me me. ⁴Pailat hiykwe sa hye sehe ma-mesopok, “Hunkwe lonuayk me lopa lwak ey so? Kwa lonuayk, uron-saw-ok poya poya hne ma me seme.”

⁵Sawk Jisas hiykwe lonuayk me lopa, sa Pailat hiykwe preiryay.ⁿ

Pailat hiykwe Jisas se lokin kwor e isay kow ha

(Mat 27:15-26; Luk 23:13-25; Jon 18:38–19:16)

⁶Pasova-enekwei lowpwarowp mokwe, Pailat so yor senkin, hiykwe kalabus-uwr prueyn, uwr sa hom ma liaup mesopok se preisias kow ha.

⁷Enekwei sohokwe uwr prueyn Barabas-ok ma me hiykwe, uwr har gavman me aw ma lono me nion kalabus mon lwak. Gavman me me-puar uwr somokwe unsaney prueyn se aw hom ma lono non lokin kwor.

⁸Uwrsa popua hay homkwe Pailat so owh mon le nok, hyo yor, Pasova-enekwei sok ma meio wayr-wayr ke hme meio kow e mesopok.

^m 15:1 Luk 22:66 ⁿ 15:5 Ais 53:7; Mak 14:61

⁹Pailat hiy hme mesopok, “Hmey, homkwe ha hme Juda mo king se preisia kow ha e mon o?” ¹⁰Hiykwe papo nuw-nonkway popriy, pris karmay homkwe Jisas se hyo iha mon sehe kow, payhokuaw, homkwe Jisas se lira way ompeys-mapeys.

¹¹Sawk Juda mo pris karmay homkwe uwrsa mo uron me me-sian-sasian, hom Pailat se mesopok e, hme Barabas se preisia kow ha e, Jisas so siopsow hokwe.^o ¹²Pailat hiy uwrsa me ma-mesopok, “Hai, hakwe uwr, hom Juda mo king-ok ma me ohokwe, penkin kiy-on ey so?”

¹³Hom ma-sahre okre me, “Now mon nak-kin pror kaww sawan e.”

¹⁴Pailat hiy ma-mesopok, “Hai, hiykwe pay me mon honsi honsi so?”

Sawk homkwe aiopey hay senkin arnuw-okre me-kreakre, “Now mon nak-kin pror kaww sawan e.”

¹⁵Pailat hiykwe uwrsa me kar mon ey e mon, sa hiykwe Barabas se hme sehe preisia kow ha. Sei, hiykwe Jisas se aw-uwr me mekow omniy nok, hmo iha mon now mon nak-kin pror kaww sawan e kow.

Aw-uwr hom Jisas se ma lourde hom non

(Mat 27:27-31; Jon 19:2-3)

¹⁶Aw-uwr hom Jisas se gavman mo a-yier mon hiy-yawriy nok, aw-uwr lowpwarowp me nak-me ok-lar. ¹⁷Homkwe omeme owh ko oupuey ke Jisas se lie kow nok, king so makwey-kokway ur inan non ke ho-a-ho nok, Jisas so makwey mon lyay kow. ¹⁸Hye ma lourde hokwe, hye king se hieyn senkin me-ihay, “Juda mo king, enekwei meipey hay kwa lwayr.” ¹⁹Hom hye makwey mon now non hrousohrou lomniy nok, somor somor-say kow nok, pamuow non nak-kuayk sakuayk nok, hye kampueys. ²⁰Hom hye lourde lowpway menkin, homkwe owh ko omeme oupuey sokwe kanseyn nok, hyo owh ko omeme arian me malie kow. Sei, hom hye now mon lokin pror kaww sawan e hiy-ey.

Jisas se now mon ma nak-kin pror kaww sawan hiy non

(Mat 27:32-44; Luk 23:26-43; Jon 19:17-27)

²¹Uwr prueyn Saimon-ok ma me hiykwe yier Sairini ko. Hiykwe Aleksander o, Rufus o, hoho orih. Hiykwe wueir ko se le, Jerusalem mon lyawriy e. Sa homkwe now, Jisas se nak-okin pror kaww sawan ey se me-sasay way.^p ²²Sa homkwe Jisas se kokwe yier Golgota-ok ma me mon hiy-ey. Uru Golgota sohiy so meykayr hokwe senkin, “Makwey-oioy yier.” ²³Serey kokwe homkwe Jisas se wain marasin mir-ok ma me non ma nak-onhwayh se kow liok, sawk hiykwe lowswa pa. ²⁴Sei, hom hye nak-okin pror kaww sawan nok, hyo owh ko omeme me kekie anon

^o 15:11 Ap 3:13-14 ^p 15:21 Ro 16:13

anon. Sa homkwe mein sor-mey non se sasow ira, hmo prueyn prueyn-aw hom owh ko omeme kopi pokwe lway ey se.⁹

²⁵Hyekwe 9 klok leisnon sok lokin pror kaww sawan nerie. ²⁶Uron-sawok hye ma lohruw-a kokwe, senkin nak-mey iarok, “Juda mo king.” ²⁷Hye nion kokwe homkwe yokun-uwr prueysyar, senkin nak-okin pror kaww sawan, prueyn hyo sayar mon, prueyn hyo irayh mon. ²⁸^r

²⁹Uwrsa yerki senkin ma le homkwe, hye ok-piap-ok me nok, makwey nak-wakin-akin. Hom me, “Hwey, hunkwe God so a se kros say e mon, sa eypok krompri nonaw ma-meio ie e.^s ³⁰Now ko se laye nok, hunkiaw-ayay hiy-ono akre akre.”

³¹Yerki liyliy-aw non kokwe, pris karmay o, sow ke hiymon sorasor uwr o, homkwe hye nuw-ourde. Homkwe homkiaw-ayay senkin me, “Hiykwe har me hiy-ono akre akre, sawk hiykwe hiykiaw-ayay liy hiy-ono akre akre ley. ³²Hromkwe Krai se lira e, Israel mo king se. Now ko se laye kara, sa hrom ka lira nan kiykiy-ay e hokuaw.” Uwr hye nion ma nak-okin pror kaww sawan hom seyn, Jisas se ok-piap-ok me.

Jisas se ma lokrue hiy non

(*Mat 27:45-56; Luk 23:44-49; Jon 19:28-30*)

³³Sa 12 klok eypok lwak menkin, kipay lowpwarowp sohokwe sa eym-nawp hiykwaw kiynuw-swakuwmay lowm-a-lowm ha. Eym sohokwe, aua krompri, sankaw lwak meiamai. ³⁴Sa 3 klok lwak menkin, Jisas hiykwe aiopey-hay senkin arnuw-okre me, “Eloi, eloi, lama sabaktani.” Ok sohok ko meyk kokwe senkin, “Hano God, hano God, hunkwe hane payhokuaw lokriy ha so?”

Sng 22:1

³⁵Uwr har, ohriar ma nakrok hom senkin lonuayk menkin, hom me, “Kwa lonuayk, hiykwe Elaija se liwower me.”

³⁶Hmo prueyn hiy laplap kopi non nak-sau nok nok, wain ma laroray non sakeyn prouk nok, now-ho mon piynay nok, sa Jisas se seyn arnak-nakray, hiy lowswa e.^t Uwr sohiy nak-me, “Pereipia, hromkwe lira ey, Elaija po pankaw laye pakane, hye now ko se kandieys kow se.”

³⁷Sawk Jisas hiykwe ok aiopey hay lokre me hain nok, lokrue.

³⁸Laplap God so a pekneyweys mon ma sawan hokwe ompok erey-ley sok kiynuw-oksa-seyr ha, eir sok oksa-seyr ha sohokwe, ouon. ³⁹Aw-uwr mo hakamay Jisas so inour mon ma lorok ira hiykwe, Jisas hiy penkin lokrue e, sehe lira menkin, hiy me, “Uwr ohokwe mo God so ney-ar soma.”

⁴⁰Sa har homkwe meiauw meiauw-aw lorok ira. Prueyn kokwe Maria, yier Makdala ko, prueyn kokwe, Maria, Josep o, nyo warkiayr Jems o,

⁹ 15:24 Sng 22:18 ^r 15:27 Grik mo mamey har homkwe ves 28 se nak-mey: God so mamey porih ko ok kamon kokwe okar po lousne, “Hye kokwe uwrsa piap-araw me hieyn po lira memeir.” ^s 15:29 Sng 22:7; 109:25; Mak 14:58 ^t 15:36 Sng 69:21

hoho pouh. Sa prueyn kokwe Salome.^u ⁴¹Galili mon kokwe, sa somokwe Jisas so meyki meyki-aw pyay, seyr hye hiymon. Sa kraiar hye nion Jerusalem mon ma le homkwe seyr serey lorok ira.

Jisas se ma lopru kwawk hiy non
(*Mat 27:57-61; Luk 23:50-55; Jon 19:38-42*)

⁴²Eypok sohokwe, Sabat-enekwei se lonhan onhan koruay enekwei (eypok ohokwe Sabat eypok so peyrmawk ma lousne hiy non). Eyrowpwar ohriar lwak menkin, ⁴³Josep, yier Arimatea ko hiy pa lousne. Hiykwe Juda mo kaunsil prueyn, uwrso hom ma komnow komnow hiymon, seyr God so Wayr-hre-yier se ma naruok hiy non. Josep hiykwe sa Pailat so inour mon hok lopa ley nok, Jisas so owhi-sopok ke mesopok. ⁴⁴Pailat hiykwe Jisas hiy lokrue se lonuayk menkin, hiykwe nuwpreiryay. Hiykwe aw-uwr mo hakamay se me-huonok nok, ok, Jisas hiy lokrue ok ma me, hok ok-ar lwak ame. ⁴⁵Hiykwe aw-uwr mo hakamay so ok me ma lonuayk so meyki hokwe, hiykwe Jisas so owhi-sopok ke Josep so iha mon kow. ⁴⁶Josep hiykwe laplap kamon nakway nok, Jisas so owhi-sopok ke kandieys nok, laplap sohiy non swakuwmay ho-a-ho nok, peir-saw, peir ke ma lopru mon lway kwawk. Sohiy so meyki hokwe, hiykwe mein aiopey hay se peir-saw sohok ko yerki-wouk mon ka-nokriy-a-nokriy ha. ⁴⁷Maria yier Makdala ko o, Maria, Josep so pouh o, hohkwe serey non-orok ira, yop, Jisas se ma lyay ke.

Enekwei Jisas hiy ma lok-sian hiy non
(*Mat 28:1-8; Luk 24:1-12; Jon 20:1-10*)

16 ¹Sabat-enekwei hiy ley lowpway menkin, Maria, yier Makdala ko o, Maria, Jems so pouh o, Salome o, homkwe marasin prawk yaprue non me nakway, Jisas so owhi ke nakey low kow e. ²Sande leison arawh-aw, ey hiy kaie nerie menkin, homkwe peir-saw Jisas se ma lway kwawk mon ley neyney. ³⁻⁴Hom ley nonaw lwak menkin, homkiaw-ayay-aw senkin lanio ohruw-a nok, “Mein aiopey hay peir-saw yerki-wowk ko hokwe, posokwaw kahis yay kow a-ney?” (Mein hokwe aiopey hay-ar.) Sawk hom ar-ira menkin, homkwe senkin lira, mein hokwe meykay mon po nokriy-a-nokriy yay. ⁵Sa homkwe peir-saw mon seme lyawriy. Homkwe sa uwr warkiayr prueyn, sayar mon liwak se lira. Hyo owh ko omeme kokwe weyspey. Homkwe sa nak-hok.

⁶Hiy me, “Homkwe peie hok o. Hakwe nonkway, homkwe Jisas Nasaret ko, now mon ma nak-okin pror kaw sawan se pawk. Hiykwe erey lwak pey. Hiykwe po ma-loksian o. Seyn lira, yop hye ma lyay kokwe, okwe. ⁷Homkwe ley nok, hyo ki-wayh me mekow, Pita se o: ‘Hiykwe Galili mon

^u 15:40 Luk 8:2-3

peymawk ley naruok, homkwe hye serey lira ey, hiy hme ma mekow hain senkin.’ ”^v

⁸Kowkow nonaw, seyr hok nonaw, sa somokwe lousne sa-ousne nok, peir-saw ko me hakan sakan. Homkwe unsaney prueyn se ok kamon pase me e, payhokuaw, homkwe nuw-hok.

Maria hokwe Jisas se lira pie

(Mat 28:9-10; Jon 20:11-18)

[⁹Jisas hiy Sande leisnon sok ma loksian hokwe, hiykwe peyr Maria yier Makdala ko, hiy niohney piap-araw iha sirom mu nareysyar hoko owh ko me ma me-su ha ko owh mon lousne pie. ¹⁰Hokwe sa ley nok, uwr paraw hye nion ma non-wak me mesor kow. Uwr somokwe unuaw liwak sir, seyr eheyr lyuk. ¹¹Hom hok Jisas hiy inaw ma lwak o, hok hye ma lira o, seme mesor me lonuayk menkin, homkwe hoko ok me pase nan kiykiy-ay e.

Jisas hiykwe hyo ki-wayh prueysyar so owh mon lousne

(Luk 24:13-35)

¹²Sohiy so meyki hokwe, Jisas hiykwe sa hmo prueys se owhi irweyk non nak-ousne, hoh yerki yier aiopey hay se ma lokriy hain se non-ey non. ¹³Hoh ma-ley nok, ki-wayh har me mekow, sawk homkwe hoho ok me seyn, pase nan kiykiy-ay e.

Jisas hiykwe hyo ki-wayh iha seys pruw non mo owh mon lousne

(Mat 28:16-20; Luk 24:36-49; Jon 20:19-23)

¹⁴Sohiy so meyki hokwe, Jisas hiykwe sa hyo ki-wayh iha seys pruw non mo owh mon lousne, hom ayay liwak sir a non. Hiykwe sa hme nuw-me-hripahri, payhokuaw, homkwe nan kiykiy-ay yor lopa lwak, seyr uwrsa hiy ma loksian so meyki hye ma lira mo ok mokwe, homkwe nan kiykiy-ay pa.”

¹⁵Hiy hme me, “Homkwe kipay lowpwarowp mon ley-neyney nok, uwrsa lowpwarowp me God so ok-ihey ke mesor kow.”^x ¹⁶Unsaney posokwaw nan kiykiy-ay e, seyr hu mon posokwaw nak-swakeyn e, hyekwe ya kahya huonok prosue a. Sawk uwr, nan kiykiy-ay pa posokwaw lwak e, hyekwe uwr heyn-non-ok me ey.”^y ¹⁷Meir omokwe uwrsa, ma nan kiykiy-ay me nion non-wak ey. Hano uru non kokwe homkwe niohney piap-araw me me-su ha ey, seyr homkwe sane-ok iwon lohruw-a ey.”^z ¹⁸Hom sok me nekie inon, hu hay non me lowswa, hmekwe liy mon piapay ley. Homkwe hmo iha mokwe uwrsa

^v 16:7 Mat 26:32; Mak 14:28 ^w 16:14 1 Ko 15:5 ^x 16:15 Ap 1:8 ^y 16:16 Ap 2:38

^z 16:17 Ap 2:4; 8:7

peik non mo owh mon kekie ey, sa uwrsa somokwe yaprue ma-lwak ey.”^a

Jisas se nonkumey mon ma huonok ie hiy non

(Luk 24:50-53; Ap 1:9-11)

¹⁹Hakamay Jisas hiy hyo ki-wayh me nion ma non-ohruw so meyki hokwe, hyekwe sa nonkumey mon huonok ie, sa hiykwe God so iha sayar mon liwak.^b ²⁰Sei, ki-wayh hom ley neyney nok, God so ok-ihey ke kipay lowpwarowp mon mesor kow. Sa Hakamay hiykiaw kokwe hme nion non-meio, seyr meir krai non hom ma meio somokwe, hyo ok hok ok-ar ma lwak ke mesair kow.]^c

^a 16:18 Luk 10:19; Ap 28:3-6 ^b 16:19 Ap 1:9-11; 2:33-34 ^c 16:20 Ap 14:3; Hi 2:3-4